







平園續稿卷第二十六

周益文忠公集六十



神道碑六

敷文閣直學士陳公良翰神道碑 嘉泰元年

自紹興壬午迄乾道壬辰十年之間士大夫舉端人正  
 士陳公邦彥必在焉蓋其議論專以格君非定國是扶  
 持公道斥遠姦佞為本當高宗內禪前二日寘之六察  
 以遺孝宗 其即位徧歷給諫每行其言立儲之初召  
 長官僚期大用于他日三聖相遺如此而歲不我與公  
 則逝矣天下至今惜之其子耆壽等以書謂某曰先人  
 即世三十年侍講朱公燾嘗狀其行而墓碑未立烏臺



虎觀之僚道同志合惟公獨在敢固以請予雖老諄尚  
能追記大略乃序而銘之公諱良翰邦彥字也世居台  
州臨海縣曾祖咸寧妣吳氏祖懷漸妣朱氏父守中贈  
奉直大夫妣碩人洪氏公幼孤天資莊重讀書輒通要  
指為文氣槩不凡中紹興五年進士第以左迪功郎主  
紹興府會稽縣簿秩滿陞從事郎知明州慈溪縣事導  
德門三鄉渠溉田利民改宣教郎知温州瑞安縣轉奉  
議郎俗號強梗吏治尚嚴公獨撫之以寬租稅揭示名  
物人競樂輸聽訟率得其情或問何術公曰清水明鏡  
不可形逃心澄亦猶是矣丁內艱服除充衢州教授轉

承議郎三十一年冬用殿中侍御史吳芾<sup>薦</sup>入御史臺為  
檢法官明年六月擢監察御史孝宗覃恩轉朝奉郎賜  
緋魚袋虜主元顏新立求和中原舊人多來歸詔問  
何以處之公言議和復受降皆非是自治可也復詢時  
務公請明階給以修軍政核軍實以豐財用禁折變以  
蘇民力省堂選以抑奔競官當久任賞罰當合衆心隆  
興元年七月除左正言首陳納諫修德畏天恤民語極  
剴切虜移書取海泗唐鄧且邀歲幣公持不可詔遣小  
使盧仲賢李拭公言仲賢輕儇拭北來難信又言廟堂  
督府異議恐失事機揚存中久擅兵柄太上皇罷就第



奈何復假使名付以邊事上皆嘉納公因言權宜與虜  
和名分不可不正陵寢不可不歸四川不可復與降附  
不可遣邊防不可弛上曰朕志已定於是書用敵國禮  
而降附不復遣使以戶部侍郎王之望知閤門事龍大  
淵往議四郡陵寢及歲幣事公與侍御史周操復言四  
郡固不當議若歸陵寢乃予歲幣聘使未應出境有詔  
侍從臺諫集議多附公說上為罷使第命小臣胡昉揚  
由義克審議官十二月遷左司諫成恭皇后受冊錄內  
外親屬二十五人公論其泛詔減七人昉由義既辱命  
宰相猶議和不置且欲罷督府右正言尹穡助之公言

出不用以直敷文閣知建寧府二年四月也兩淮已徹  
備虜遂大入上深悔之太學生數百人伏闕乞召用公  
等不報用治最就升本路轉運副使作觀風九詠諭厚  
本善俗之意行部不許治道供張例餽皆却之改提點  
江東刑獄又徙浙西歷朝散朝請即乾道四年十一月  
以宗正少卿召還五年兼權太常又權侍立官又兼權  
給事中四月擢兵部侍郎賜服金紫浙東風水敗秋稼  
州縣隱蔽公白遣漕臣按視賑恤官吏多抵罪兼同修  
國史轉朝奉大夫十二月除左諫議大夫臨安帥多創  
攝局私親故秀守遣吏市燈中都閩公除日昏懼而報



公入對以敬天愛民脩政官人四事為獻六年正月戊辰大雨震電庚午大雨雪公請畏天戒正庶事儲位未正手疏言之先是上雖勉從和好志在恢復有王天覺者用聚斂擊刺之術迎合為圖冊因近習以進得樞密院編修官言者交攻未聽因公極論始去之史正志憚守成都創發運使得黃公奏祖宗立國于汴重兵屯西北故運東南之粟今軍國就食東南此職安用疏累上面再三繼以求去上還其奏公論列不已正志竟罷公嘗言蜀漢之師下閩陝由荆襄趨韓魏江淮擣青徐今日大計也四川既命大臣宣撫荆淮自當一體又言

中興初如劉光世之部落韓世忠之背嵬張俊之親隨皆擇驍銳優其廩犒以勵諸軍故能所至成功願取以為法上然之下其制于諸將宗寺玉牒書成轉朝散大夫七月進給事中終兩月節度使成閔冒請真俸有司坐獲譴閔門王抃矯詔遣妾人謝顯出竟顯抵罪而置閔及抃不問公並封勅還之明日改除禮部侍郎固辭不拜以敷文閣待制提舉江州太平興國宮七年起知婺州未上召為太子詹事連詔趣行仍命州郡禮遣既對上勞勉甚至未幾命公與其同對選德殿手錄唐太宗與魏鄭公論德仁功利之說批聖語于後使極陳今



之未至者公退而上疏曰仁德治之本功利治之效務其本則效自至今水旱數千里流殍萬計是承天意者未至也金陵創營寨役夫凍餒不聊生是結民者未至也欲任賢能而張拭一言遽從外補欲退小人而正志方遂張松繼之松罷韓玉又進矣欲擇將帥而股剝交結如初欲收軍情而老幼困于移戌至如詳刑叅用武臣久任乃復數易誠能革此八弊則仁德無累功利自致疏奏上悅以示輔臣旋命公及其弟並兼侍講俄以足疾乞去詔聽五日一朝力辭不允十二月遂告老上知公果病除敷文閣直學士再提舉興國宮就賜誥身衣

帶八年四月轉朝請大夫致仕癸丑卒于正寢享年六十五爵臨海縣開國男食邑三百戶待贈大中大夫是歲十月壬申葬縣之義城鄉疊石山之原諸子升朝累贈金紫光祿寺大夫妻碩人朱氏累封魯國太夫人後公二十五年薨四男元壽通直郎福建安撫司幹辦公事後十九年卒著壽朝請郎新權發遣常州彭壽朝散郎通判沅州廣壽朝奉大夫行太常丞兼權倉部郎官身好學皆有家法二女朝散郎前通判撫州黃朴宣教郎前監兩浙轉運司物斛官吳洎其壻也孫男十八人文之奉議郎知隆興府新建縣前卒振之國子進士揚



之後之方之國子進士擇之學之奇之迪功即新饒州  
司戶叅軍謙之文林郎新袁州軍事判官孚之誠之太  
學生說之拱之淳之詠之挺之存之仔之孫女八人長  
適迪功即南劍州尤溪縣尉范大雅次適進士黃如阜  
石繼時迪功即新撫州金溪縣主簿趙師羔文林郎新  
潭州湘潭縣丞趙汝适次在室次適將仕郎趙希賢次  
尚幼曾孫男女二十一人公質直好義氣和而守正早  
為族父禮部侍郎公輔所知期以遠器自寒素至通顯  
奉養如一內難後不復入私室用度悉出祿賜未嘗問  
產業誨督子孫接誘後進收：不倦人有片善力加稱

獎不善即規正之既葬十八年光宗踐祚追思舊僚官  
未應謚特以獻肅易其名禮部尚書尤袤之守台也邦  
人乞祠公于學尤公以為宜繪公與提刑羅適及族父  
小宗伯合而祠之榜曰三老有奏議文集二十卷銘曰  
三聖相授 精一惟心 大政所咨 左右惟人  
侃：陳公 端諒清醇 鴻漸于朝 適宏厥聲  
克老欲傳 寘諸臺評 重華繼承 地禁職親  
獻可替否 盡忠竭誠 身有進退 道無訛信  
禹在震方 溫文日新 宮尹孰宜 公惟當仁  
胡不萬年 遂都四隣 天以遺直 成其令名



我為銘詩 式穀來今 不顯臣良 於昭君明

敷文閣學士李文簡公燾神道碑 嘉泰元年

韓愈以天刑人禍歸咎史筆柳宗元隨闕其說後人終  
致疑焉今以李文簡公驗之何疑且左氏紀諸國之事  
史記上下數千載是：非：利害不專及當世若公續  
司馬光資治通鑑為本朝長編上闕國體下涉諸臣之  
家非異代比使天刑人禍可信續能結知明主是相多  
士生歷清要沒定美謚諸子繼踐世科歷二千石光顯  
未艾如李氏者乎况公出入中外見謂忠直盡言交游  
貌示強禦雖微作史自當齟齬難合然謬問不行于朝

士大夫鮮食怒者何也守道正蒞職公事上不欺應物  
無心天人交助其在茲乎既沒十八年蜀多文士其子  
不近求銘詩而遠屬耆老非以同朝夕相知深也歟是  
宜序而銘之公諱燾字仁甫一字子真系出唐曹恭王  
季子右武衛大將軍德武后斥為民徙眉州之丹稜縣  
遂家焉六世孫瑜始復屬籍仕至長江令公長江十一  
世孫曾祖夔祖夙贈奉直大夫考中朝奉大夫知仙井  
監累贈宣奉大夫妣碩人史氏公生政和乙未天資穎  
異博覽經傳獨不樂王安石學甫冠已著兩漢鑑明年  
追念靖康變故著反正議十四篇人皆竒之紹興八年



第進士調成都府華陽縣主簿未上讀書本縣龍鶴山  
命曰巽巖自記云子真子三卜居乃得此山向東南面  
西北其位為巽為乾蓋處身非乾健無以立應物非巽  
順無以行易六十四卦仲尼擬其九而三陳之起乎履  
止乎巽此講學之序也語曰可與共學未可與適道可  
與適道未可與立可與立未可與權夫人各有所履善  
惡分焉惟能謙可與共學惟能復可與適道知所適而  
無以自立則莫能久故取諸常使久于其道或損之或  
益之至于困而不改若井未始隨邑而遷則所以自立  
者成矣雖然吉凶禍福橫發逆起有不可知將合于道

惟權乎然非巽則權亦不可行學而至于巽乃可與權  
此聖賢事業也年方二十四其志趣學問如此久之赴  
華陽時宰秦檜知公名公不與通會詔郡國舉賢良公  
携五十策謁成都帥張燾不果薦秩滿外銓復直教授  
闕公亦不就注嘉州軍事推官丁父憂二十年服除再  
注雅州軍事推官作當直司箴諷郡守用私情背公法  
者總領財賦符行中屬公增簡州益筴公移書力拒之  
舊相張浚謂有臺諫風二十四年改宣教郎知成都府  
雙流縣日坐廳事訟至立決前執政李文會自瀘徙益  
府下九縣供張加倍公用常奉李由他道去 張氏子



競家資公曰汝方在喪忍墜先訓盍歸思三日復來果  
悔過自新大姓李零市丘成之產業公以成之太白所  
生母追正之零譴辭訐府公列刑經義律文正零法豪右  
歛迹邑庭如水日緇史冊彙次國朝事實謂司馬光脩  
史先為百官公卿表十五卷後頗散逸乃徧求正史實  
錄旁採家集野史增廣門數起建隆迄靖康合新舊官  
制成一百四十二卷其重編先者僅七之一長編之書  
蓋始于此二十九年四川制置使王剛中辟公幹辦公  
事三十二年知榮州：因山為城川為隍夏秋常患水  
溢公築防禦之隆興二年除潼川府路轉運判官入境

劾守令四人州縣多橫歛公選官置局括一道財賦列  
其名色使有無相補酌三年中數而為帳徧示官吏許  
擿不當更定名為科約至今不廢母憂去官乾道三年  
召赴行在八月入對上太祖故事乞為法請許六察言  
事又言軍興三十年蜀賦一錢折變百之願自此勿增  
取况蜀兵已多宜罷招刺嚴簡汰禁大將毋張虛籍梧  
部曲孝宗嘉納除尚書兵部郎中以父諱下行負外郎  
兼國史院編修官又兼禮部會慶節上壽在郊禮散齋  
內議權作樂公言漢唐祀天地散齋四日致齋三日我  
藝祖初郊亦然自崇寧大觀法周禮分祭天地故前卜



日受誓戒今既合祭宜復漢唐及本朝舊制度幾兩得  
照垂拱上壽止樂正殿為此使權用十二月正除禮部  
員外郎公言中興祭典未備岳鎮海瀆先農先蠶風雨  
雷師九祠以酒脯代牲牢近者雨暘失節郡國水災殆  
或以此詔復舊占城國入貢依宗寧五年勅書用白背  
金花綾紙貯以金鍍銀匣公請如近例學士院謂禮部  
不當預公曰典禮先有司部兼掌客豈侵官耶長編卷  
帙漸成蜀師汪應辰乞下臨安府給筆札繕寫藏秘閣  
公遂進國初至治平一百八卷特遷兩官公患時文衰  
弱乞令考官取學術醇正切于世用之文苟涉虛浮必

行黜落明春省試勅榜戒諭上方厲精為治事或中出  
公輪對言唐虞三代專以輔弼漢唐或謀卿士今捨二  
塗近習必進此治亂之機惟聖明深慮過防益有所指  
也又奏省闈取士本不立額乞參皇祐四百之限稍加  
裁定舊特奏名雖賜出身罕授職任近兩榜至八百五  
十餘人放選注官而賢良方正一件則寂無應詔當責  
舉者讀畢遂言天下有變經營北方未見可付之人上  
曰朕當自將公曰聖諭及此與真宗濟澶淵合矣上曰  
此朕家法太祖平澤潞取維揚太宗平太原皆是也公  
請先自治以待時上聳聽不倦近侍皆跛倚明日諭三



省議省額特恩二事有沮之者乃已五年四月遷秘書  
少監太史言八月日當食公上疏曰 災異所以儆戒  
人主今經筵不訪問言路罕論奏大臣無趙普補綴奏  
目杜衍封還內降之風臣恐憂不在疆惟陛下進眾正  
消群陰以應天變是冬並兼權起居舍人六年雷震上元  
後一日公錄仁宗景祐三年正月甲辰求言寬賦欽二  
詔以進直前乞刊定徽宗實錄之疎舛者因言臣方修  
進治平後長編若就加討論它時可助正史詔復開實  
錄院四月首命公為檢討官汪應辰進公子虛賢良詞  
業上曰卿有子矣范成大除右史升攝起居即議者誤

引元豐八年十月詔欲廢二浙保正止存耆長又宰相  
以蜀人帥蜀工部並除二侍郎武臣點提刑獄皆違舊  
制公援證再三上曰卿論事根據極當朕心左相陳俊  
卿出知福州右相虞允文既任恢復未免更張公言二  
典若稽古夏有典則商云成憲周云舊章漢云故事子  
孫莫之敢廢王安石變更法度厲階可鑑上欲除公兵  
部侍郎公自攝記注數論事宰相頗不樂公遂請去六  
月除直顯謨閣湖北轉運副使陸辭以欲速變古為戒  
又奏禹貢九州荆田第八賦乃在三人功既修遂起五  
等今田多荒蕪賦虧十八上委公條畫至則言創耕憚



科斂且畏爭奪宜寬冒占廣激勸如太祖乾德四年許見佃者止輸舊稅更不通檢詔如所請其妄執契爭奪毋受理守令能勸課者賞之總賦呂游問奏計公攝其職歲饑發戶部大軍倉賑民僚佐爭執公曰吾自任責不以累諸君請如數償之游問歸劾公專輒上令具折而已七年庠中制科八年以舊官趣召會虞允文由左相宣撫西川自詭北伐疑公異議預白上改直寶文閣帥潼川兼知瀘州首葺石門堡置戍以泥夷人叙州舊市羈縻馬價頗平比歲增其尺寸償直不以時公言國計邊防胥失之乞戒茶馬司互市毋溢額仍勿于夷漢

禁山內伐木造舟尋皆報可守邊踰歲淳熙元年被召遣城中火公上章自劾既放罪矣提刑何熙志奏公不親至火所併指長編記魏王食肥羸語涉誣謗上曰此載皇宋事實何害止命成都提刑李夔體量火事公行及國門乞祠待辨除江西轉運副使且許臨遣公進治平四年至元符三年長編四百十七卷或勸公方被謨勿及時事公曰聖主金度如此竭忠所以報也遂奏述者日食地震夷狄小人不可不慮又上快歲引太祖退朝悔乘快事以諫上曰朕當揭之坐隅進秘閣修撰旋坐火後不盡書焚室貶秩一等而熙志以輒議史事削



兩官公至江西置一路財賦都簿以潼川科約未幾召  
還乞令本路毋以臣去廢此書上曰卿不為高論務在  
便民甚善擢祕書監權同修國史權實錄院同修撰蓋  
專付公以史事故用侍從之禮三年正月也公前數言  
南郊明堂均大禮自宜迭行適轉對申前說上令集議  
嬖近謂于德壽宮有嫌沮不行及予為禮部尚書與諸  
儒議周成王宗祀文王漢武帝陟配高祖所謂嚴父指  
周公也晉唐及本朝名臣皆有是說非出于燾發之耳  
其議遂定三月除權禮部侍郎賜服金紫七月壬戌雷  
震太廟柱壞鳩尾有司隨加繕治公奏此非所以祇天

變當應以實上諭大臣燾愛朕屢有謹言公嘗謂正太  
祖東鄉條上熙寧元符紹興議論其後卒行之進四繫  
錄記女真契丹起滅自紹聖迄宣和靖康凡二十卷上  
曰朕可一日忘此虜哉九月兼侍講以經筵少開錄趙  
師民勸講歲以諷并及仇士良不欲人主讀書近儒生  
之說會改潛邸為佑聖觀璿璣殿于太一宮公密疏二  
千餘言上褒答之四年春駕幸太學命公執經特轉一  
官堅辭不聽公自即春官已極論科舉及特奏名去冬  
乞依紹興二十七年二月詔書用經義詩賦論策四場  
如元祐時仍采蘇軾議量收恩科至是力請變文體取



實學以致人才上袖公奏付三省下學官議國子司業  
鄭伯熊等請如公言而老生晚學諱言不便議遂格八  
月真拜侍郎仍兼工部徽錄置院又公薦呂祖謙為秘  
書郎兼檢討官審訂增削數百條書遂成特遷一官或  
請升降兩學從祀衆議不同第去王雱像用公說也元  
符接靖康長編成上稱公無愧司馬光後有表云豫席  
恩言比迹先正指此夜 宣引奏意者蒙氣蔽日厥占  
不肖者祿股肱耳目宜謹厥與賜坐欲起上再留賜飲  
賜茶恩意甚寵尋詔監視太史測驗天文公為即時已  
言乾道新曆不可用舉差失數十條詰太史局官皆無

以對然卒無知曆者公又欲叅酌開寶通禮政和五禮  
新儀為一書雖下禮官亦不能成九月丁酉日當夜食  
公為社壇發告官成伐鼓禮廢公舉行之先是屋入秘書  
為正字旋兼國史編修實錄檢討遷校書著作父子同  
典史事搢紳榮之公感上知論事益切每集議衆未發  
言公條陳可否無所避會近臣復舉公次子塾應科目  
黜於閣試屋適考校上舍生發策云：為御史所劾語  
併及公屋降一官罷公以本官知常德府初政和七年  
昴澧辰沅靖州置營田刀弩手司給由募人開邊范世  
雄張宗等附會擾民建炎三年亟罷之乾道未守臣劉



邦翰請復行于辰沅靖三州公為轉運謂不當復已而  
提刑尹機迫郡縣行之田不能給公至請度田額事下  
諸司公獨約帥臣張栻具奏上即從之境多茶園異時  
禁切商賈率至交兵公曰官捕茶賊豈禁茶商聽其自  
如迄無大吠警六年丐開提舉江州太平興國宮是秋  
行明堂大禮上以公首建議特除敷文閣待制頃之屋  
塾繼亡上欲以吏事銷憂起知遂寧府用蔡挺涇原衙  
教法闢勤武堂親閱士卒其雜居市廛者葺營聚之七  
年史院進四朝正史經修官在外者例減磨勘二年宰  
執奏正史頗採李燾長編地里一志又出其手詔減年

外別轉一官公自奉議郎年勞賞典積官朝議大夫避  
父名過遷秩寄理者三于是轉通議大夫公以酒課加  
重奏榷酤起王莽而成于德宗本朝郡釀有監司尚不  
許今乃設法勸飲以耗民財縱未能盡弛猶當用買撲  
舊法罷去官監上意鄉之而計司迫贍軍月減三十緡  
而已公節用度停燕官府肅然前得旨長編或有增損  
依照寧修三經義法具奏至是上四千四百五十餘條  
又以一百六十八年事散九百八十卷一覽難周別為  
舉要六十八卷總目五卷修撰事目六十卷時召命已  
下公控辭久之上數詢來期十年六月對延和殿邇英



方讀陸贄奏議公據贄言切今者數十事勸上力行且曰贄雖相德宗其實不遇今可謂千載一時上曰惟不遇于當日是以其言垂後世公又奏陛下即位二十餘年志在富强而兵弱財匱與教民七年可以即戎異矣上有無功業之歎公曰功業見乎變人事既修天應乃至上曰卿宿德耆儒宜在左右任史職進敷文閣直學士提舉佑神觀兼侍講同修國史七月久旱公進避殿損膳求言故事上亟施行命侍從臺諫兩省卿監館職實封言事趙彥中草詔云意者委任或非其人公奏陛下委任不過三四大臣神宗語富弼云唐太宗與魏徵

議政事 爭競宜勅二府以魏為法毋若元豐王珪號三首相三旨者謂上有可否珪曰領聖旨論軍國事曰誠如聖旨啟擬曰取聖旨也又謂戶部不足南庫有餘請如唐建中罷瓊林大盈庫歸左藏上以奏付外讀者失色丁丑遂兩日一宣對公言外議陛下多服藥罕御殿宮嬪無時進見浮費頗多上曰感卿忠愛然朕春秋已高安得此聲近惟蔡李婕好用三萬緡無它費也上憂熒惑嘗入斗公言天道遠惟正厥事可以弭災類次漢元鼎至宣和四十五事以進十一月朔日當食心八分公曰心為宋分為天王位潛陽將復陰氣乘之小人害



政夷狄窺中國之象復條上古今日食是月者三十四  
明日對延和又及晉何曾譏武帝無經國遠圖上甚嘉  
獎是歲公賦詩云明年七十吾歸矣預買北閨門外舟  
至冬疾作三省請給告十日上曰老者不以筋力為禮  
可半月十一年春表乞致仕優詔不允上數問宰執公  
疾增損何如萬里召來豈容輕去丞相王淮曰燾知進  
退宜從所請上曰脫不幸有故於道路奈何可諭其鄉  
人給事中宇文侂留之侂傳上旨公曰臣子戀闕非老  
疾忍乞骸骨因詢侂時事勉以忠義蓋聞四川制置使留  
正總領馮憲論減酒額猶手劄贊廟堂行之二月病棘

甲子除敷文閣學士轉一官致仕命下喜曰事了矣口  
占遺表云臣年七十死不為天所恨報國缺然願陛下  
經遠以藝祖為師用人以昭陵為法辭氣安定俄卒上  
聞嗟惻賻銀絹三百疋兩贈光祿大夫令臨安治後事  
沿江漕司津置歸舟他日語宇文侂曰朕嘗許燾大書  
續資治通鑑長編七字且用神宗賜司馬光故事為序  
冠篇不謂止此也公孝友誠實性無嗜好惟潛心經史  
有易學五卷春秋學十卷故其出處本于潔靜精微著  
述則評論今古別白善惡得褒貶之旨所至求與篇隱  
佚傳錄讐校雖陰陽卜說亦無遺者家藏積數萬卷為



文語道而理備考蜀類試叅詳南省多得名士薦人輒  
削藁前兩入朝適虞允文暨趙雄當路士大夫爭談兵  
二公皆蜀人雅敬公：一無所詢晚在經筵人頗懷安  
公 上前日紛：今日默：俱非自治其持論不隨時  
類此公著五經傳授尚書百篇圖大傳雜說七十二子  
名籍各一卷文集五十卷奏議二十卷四朝史稿五十  
卷通論十卷南北攻守錄三十卷七十二侯圖陶潛新  
傳并詩譜各三卷歷代宰相年表二十三卷唐宰相譜  
一卷江左方鎮年表六卷晉司馬氏本支齊梁本支王  
謝世表五代三衙將帥年表各一卷本朝事始兩卷建

隆遺事辨趙普別傳科場沿革集賢學士并賜帶典故  
各一卷范韓文富王歐陽司馬三蘇及六君子年譜各  
三卷明年七月己酉即葬巽巖之陽妻碩人楊氏同邑  
贈朝散大夫素之孫黃庭堅為記大雅堂者後公八年  
卒祔焉七子謙早死庶終奉議郎主管成都府玉局觀  
至今為朝請郎權發遣忠州塾終承務郎堊亦止壁壘  
皆登<sup>科</sup>壁今為朝散郎權發遣漢州壘承議郎主管華州  
雲臺觀六女均適朝散郎知果州曹執中坑適朝奉大  
夫知崇慶府師祖慶壇適文林郎漢州：學教授某阜  
典適薛絃穎增適承議郎克雲安軍使兼知縣事張仲



堪適朝散大夫利州路提點刑獄公事范子庚孫十一人鐘宣義即錫修職即彭州九隴縣主簿鑑鉢鉢周鉤鐘銓積簡其三今亡鉢周鐘也女三人長馴早夭次真適修職即孫網亦不在從適迪功郎新雅州廬山縣簿尉劉成季曾孫十一人公爵丹稜縣開國伯食邑七百戶諸子升朝贈少師而贈楊氏福國夫人銘曰

尚書記言 春秋書事 經別以六 史居其二

漢太史公 儀尊相臣 我朝大典 亦歸宰庭

時政有記 起居有注 東觀石渠 諸儒所聚

設官分職 上下相維 合力纂修 猶懼闕遺

公生遐方 初筮州縣 閭于期會 屈首鉛槧

祖功宗德 業鉅事叢 政有因革 論多異同

禮樂制作 夷狄版服 原始要終 咸舉綱目

三入承明 迄用奏篇 帝擬以光 士推如遷

問胡云然 多聞諒直 舞禮文姦 視若仇敵

以此事君 忠讜不欺 出而臨民 敬簡無私

赫：榮名 番：壽考 慶流子孫 殃則何有

螭首龜趺 刻以銘章 申勸剛者 公為不亡

平園續稿卷第二十六 終



公之為人  
其學之淵  
其德之厚  
其行之高  
其志之遠  
其心之平  
其氣之和  
其言之簡  
其處之裕  
其居之安  
其食之節  
其衣之淡  
其視之明  
其聽之聰  
其思之敏  
其辨之精  
其論之博  
其筆之健  
其畫之妙  
其書之古  
其詩之雅  
其文之麗  
其詞之麗  
其賦之麗  
其樂之雅  
其舞之雅  
其射之雅  
其奕之雅  
其博之雅  
其圍之雅  
其角之雅  
其六之雅  
其七之雅  
其八之雅  
其九之雅  
其十之雅

平園續豪卷第二十七

周益文忠公集六十七

神道碑

敷文閣學士宣奉大夫贈特進汪公天猷神道

碑 嘉泰元年

子夏曰死生有命富貴在天是謂格言雖然仁者多壽  
賢者多貴則有人事恭焉今敷文閣學士汪公年開九  
帙官職皆三品爵二品殆仁賢之驗也公諱大猷字仲  
嘉慶元府鄞縣人曾祖元吉以廉平吏受知范文正王  
文公妣何氏祖洙號儒先本州助教贈正奉大夫妣  
碩人陳氏父思溫歷兩浙轉運副使太府少卿終左朝



議大夫直顯謨閣累贈少師妣越國夫人王氏四子公  
其仲也四歲對客誦孝經止十七章或問末章以具慶  
對客異之八九歲述先生口義示同舍十餘歲賦詩可  
觀紹興七年少師遇宗祀奏補將仕郎起家右迪功郎  
衢州江山尉十五年登進士乙科夏大水括鹽舟濟避  
溺者又發廩為糜食之州符捕來暮鄉魔賊公曰賊有  
無尉豈不知茅呼菜食一二人杖遣之監司交薦陞左  
從事郎移婺州金華丞與民期限必信人亦信之豪族  
陸氏爭產久不決公曉以恩義悅服而退戶郎侍郎李  
椿年行經界法量田不實罪至徒流檄公覆視龍遊縣

公曰法峻民未喻固有田少而供多者願許首復改正  
又謂每保各畜頃畝林塘十保合一人圖用紙二百番  
安所展視李聽其言輕刑省費為多二十年丁內艱二  
十三年再丞嚴州建德用舉主改左宣教郎知平江府  
崑山縣未上丁外艱二十九年辟顯仁皇后攢宮屬官  
訖事為淮西江東軍馬錢糧所幹辦公事三十二年孝  
宗受禪自左叅議即轉承務郎賜服緋銀入幹辦行在  
諸司糧料院隆興二年虜寇邊錢簡肅公端禮宣諭淮  
辟幹辦公事遷大宗正丞陞叅議官歷左朝奉朝散郎  
錢公執政乾道元年兼侍右郎官又兼戶部右曹六月



輪對乞覈名實責任臣下量能授官毋違所長擢禮部員外郎仍兼侍右九月遷尚左郎官莊文太子受冊兼左諭德仍侍講二年省試充叅詳官六月遷秘書少監首率館職續編國朝會要高宗聖政成書轉左朝請郎三年冬假吏部尚書接送伴金國賀正旦使四年兼權刑部侍郎又兼宗政殿說書夜直數宣對會遣御史決獄畿縣公言其擾請委倅貳台民揚大任縛所藏盜赴朝希賞政府疑之公曰舍匿罪未發而能募賞執賊若生以赴許無復告捕者矣上皆然之宰掾言太祖朝強盜不分首從不問殺傷併贓滿三貫者死景祐勅增至

五貫固已從寬今設六項法非手及人例奏裁黥配何所懲艾請從舊法詔侍從臺諫集議公言賊知必死將甘心於被盜之家故稍開其生路後迄不改暫權給事中公以中興修法已四十年積續降二萬餘條乞從刪定詔委刑部大理長貳及僚屬掌其事而以公兼重修勅令詳定官五年再叅詳省試轉左朝奉朝散大夫四月正除權刑部侍郎外侍講上諭公既為從侍天下事皆可論朕每厭宦官宮女之言數延見經筵官自今朝政闕失民情利病勿惜盡言公奏前後臣僚論事衆矣未嘗簿錄何以考其行否宗室非嶽祠則員外置離軍及



歸正官多不釐務何以顯其才能兩淮多曠土宜置力  
田科募江浙富民自以耕夫牛種開荒苟有成效特補  
官凡配隸人亦聽授田雜耕又言贓吏及囊橐盜賊者  
財產沒官可也若倉庫網運欠折而無獎責償苟足合  
歸其業不 斥賣或賜勳戚州縣私立稅場擾及行旅  
鄉坊捕灑如治大辟頭加禁止上嘉獎曰卿所陳皆可  
行有用之才也選充金國賀正旦國信使六年使回轉  
左朝請大夫上方經略中原將命者多縱吏之上以諗  
公：謂虜法簡嚴上曰未可圖耶公頓首曰誠如聖訓  
姑修人事以俟天應閏五月兼權吏部侍郎進續會要

轉左朝議大夫六月改權吏部侍郎尋兼尚書轉左中  
奉大夫十一月勅令格式進書增損元文五百七十四帶  
修創立三百六十一刪八十三留以照用者百二十有  
八公用力為多轉左中大夫上嘗問黜陟 卿職者有  
過差否公言溫台水災守臣王之望陳巖肖以前執政  
從官放罪而二漕削官知信州趙師嚴補前守移兌常  
平米反以擅用鑄秩毋得親民提舉官李庚已付隣郡  
推治乃坐不檢察罷勿與監司上並許改正公蚤侍少  
師即銓曹耳熟清通暨歷三選力破有司從窄之論迨  
兼長貳益得行志士大夫鬱滯頓伸法或不可明以告



之辨宗室及陣亡人女夫奏薦不當入七色恩科選人乞休致許用嶽廟歲月理權入官之考命官公過非經勘正勿關刑寺注簿凡案後收坐者就部原赦結絕存心之仁類此上下翕然賢之郊裡差五使宰執不備待命公充鹵簿使有忌之者禮成不自安請去七年正月除敷文閣待制提舉江州太平興國宮侍從館閣分韻賦詩以餞四月起知泉州海中大洲號平湖邦人就植粟麥麻有毗舍耶蠻揚颿奄至肌體漆黑語言不通種植皆為所獲調兵逐捕則入水持其舟而已俘民為鄉導劫掠近城赤嶼洲於是春夏遣戍秋暮始歸勞費不

貲公即其地造屋二百區留屯水軍蠻不復來久之戍將貪功妄捕真臘大商兩舟至庭公辨而遣之左翼軍列寨郊外軍人夜踰城盜金庫為邏卒所執反誣卒為盜公得其實主將懼罪爭辨公界軍中自治之舊例蕃商與華人鬪非折傷聽贖公曰既在吾境當用吾法爭鬪用稀詔許三佛齊寄銅造瓦公奏在法銅不下海且中國方禁銷鑄奈何為小夷所役卒不與鬪地狹田少歲積廣米每患客舟不時至入籍上戶航海者出錢數萬緡貸之使糴于五羊比婦損價以糴官收其本子與其人南外宗子初終數房又益蕃衍廩給不足而僧田



多戶絕豪右增租爭佃公論見佃人若受所增最高之  
 數歲以輸官聽如其舊佃戶樂從宗子月給遂足九年  
 進敷文閣直學士再任就賜衣帶淳熙元年轉大中  
 夫請祠六月再提舉興國宮江西謀帥道隆興府赴闕  
 臨遣甚寵吉州龍泉縣豪民王氏父子鬻爵怒武尉驗  
 田不如欲集惡少狙擊折足州不能治移鞠傍郡猶不  
 承公與諸司具奏決配嶺南人皆快之二年湖北茶寇  
 賴文政轉剽湖南入江西據永新禾山洞公遣宿將賈  
 和仲帥師討之和仲輕敵敗歟六月詔公節制軍馬賊  
 短兵輕甲一晝夜馳山谷二百里官軍困追逐公曰技

有長短不可強也分兵遮道列賊感欲降公與提刑辛棄  
 疾議遣興國尉黃倬持檄招諭而公先自劾和仲喪師  
 七月降龍圖閣待制又降集英殿修撰罷帥事十月落  
 職南康軍居住而賊迄就降誅之始公使北曹覲為介  
 頗疑簡驩至是亦方下石逞憾云再暮方許自便後八年  
 乃提舉興國宮十三年德壽慶典還龍圖閣待制轉通  
 議大夫明年再任十六年正月改鳳翔府上清太平宮  
 光宗覃恩轉通奉大夫紹興元年復敷文閣直學士十  
 二月磨勘正議大夫二年以正奉大夫致仕今上即位  
 遷奉大夫詔書求言仍賜銀盒茶藥慶元五年冬優



禮老臣特升學士賜衣帶鞍馬六年七月庚辰以疾薨  
年八十一遺奏聞贈特進妻碩人同郡樓氏先二十七  
年卒三子端中奉議郎兩浙西路提舉常平司幹辦公  
事賜緋魚袋立中宣教郎知婺州武義縣丞儀中受遺  
澤四女三早夭一適奉議郎知福州永福縣樓錡再適  
修武郎東南第六副將趙善琮孫男四人之翰承奉郎  
監嘉興府華亭縣市舶務之幹之輔之範女七人長適  
迪功郎新臨安府臨安縣尉裘得宜次適沈楷通仕郎  
趙樽王元恭餘未行曾孫女二人先是碩人葬慈溪縣  
石臺鄉龍潭之原十二月丙申公合葬焉爵自奉化縣

開國男積封本郡公食封通二千五百戶實封 百戶  
公立朝盡心職業深為孝宗所知雖與史丞相浩同里  
同年魏丞相杞少相從蔣丞相希並為儲僚而公恬於  
進取一無附麗中間謫南康有言公者公笑曰某年踰  
五十若以恩科入官得尉星子不賀我乎客聞歎服杖  
屨往來廬山和陶令歸去來辭觴客則歌之還鄉十五  
年踰七十即納祿又十年兩值登極應詔陳治道各數  
千言八十被優異之恩女兄樓夫人長公十歲亦封郡  
夫人兩家賀賓客盈門燕集者累月士大夫榮之少師天  
資仁厚常曰事：方便物：利益是吾志也公推廣力



行始終不急葬少師後析常產遺兄弟公以四之一獨  
任百費竭力營家舍有餘亟作無則暫輟閱再歲乃成  
女弟三人俱得所歸遇大禮三蔭其姪今諸孫尚白丁  
性樂施宗姻緩急皆歸之著興仁錄示子孫四明風素  
厚公割田二十畝創立義莊欣慕者衆積至三頃郡守  
林大中助以絕產二頃擇鄉官主之遇士族清貧者家  
有吉凶各為限制隨事白郡下莊第給遂為無窮之  
利府學當葺公自任儀門又為文勸有力者不日而新  
冬至元日集鄉士行禮大成殿下退序拜明倫堂歲講  
鄉飲推長者祭酒自齒韋布之列凡里中義事悉為主

盟不喜飲而喜延客坐上常滿各得其懽心平居慕白  
樂天為人未六十即退閒以適名齋宜靜名室時作歌  
詩平澹造理從容二十有五年庶幾樂天之出處壽則  
過之立朝好延譽後進識樞密葉公翥於掌故之中交  
游如錢尚書象祖劉侍郎孝驥史待制彌大都司潘時  
屯田鄭錡簽判沈銖推揚汲引惟恐不及晚尤篤學抄  
書如少年有適齋存稿二十卷備忘十七編唐宋名公  
詩韻四十編併漫錄訓鑿等書藏于家予昔與公同朝  
相好也去夏書未酬聞公訃諸孤遠求隧道之碑而翰  
林尚書樓公鑰復示公行實且曰吾母年將期頤哭弟



不勝哀况於其甥願賜之銘以慰存没乃為銘曰

惟右賢者 匪懈為仁 眾欲汎愛 均焉無貧

猗與汪公 後已先人 俶佐三邑 已勤利民

翔于禁塗 謀告力陳 司寇枉直 典銓滯伸

苟可澤物 心無踈親 歸哉二紀 壽祉交臻

肆推緒餘 施及鄉隣 既昌其詩 亦榮其身

仰止香山 逝將擬倫 刻銘豐碑 永世弗湮

資政殿學士宣奉大夫叅知政事蕭正肅公 燧

神道碑 嘉泰元年

烝民美宣王任賢使能周室中興孟子曰賢者在位能

者在職此服休服采之辨也孝宗皇帝實兼用之當是

時經武理財期據高文之宿憤差擇能臣比肩于朝惟

故叅知政事蕭公靖共正直簡在上心未嘗談兵言利

而編歷要劇兼贊鈞樞異乎效能於一職者嗚呼孝宗

可謂善任賢矣公可謂進以德矣今公之子以里人工

部謝尚書諤所狀行實請碑墓道予與公居隣邦仕同

朝晚復共政其何可辭公諱燧字照隣先世唐望族散

居潭之瀏陽南唐時徙袁州新喻縣今隸臨江軍高祖

集賢殿脩撰 天聖進士皇裕初為廣西轉運使知儂

智高亮狡條上羈縻之策樞臣沮之智高果作亂反坐



夫察降知吉州嘉祐中帥桂林消患折衝為多王文  
公安石志其墓曾祖某官贈太子太保諱洵妣河南郡  
夫人張氏祖朝散郎通判江州贈太子太傅諱鏞妣東  
萊郡夫人趙氏東海郡夫人陳氏父贈少傅諱增母鄭  
國夫人陶氏繼母許國夫人李氏紹興初復制舉少傅  
用逆臣薦至闕請闕言路宰相不悅罷歸教諸子以學  
公獨穎異幼能屬文十八年進士第五人授左從事郎  
平江府觀察推官郡守李朝正號剛嚴僚吏畏縮公遇  
事別白是非朝正敬焉秦丞相檜親黨密語公曰秋試  
必主文漕臺公詰其故則曰丞相有子就舉將以屬公

公怒曰某初仕敢欺心耶漕檄下乃秀州也至則員溢  
就試院易張教授者云秦嬉果前列初公未第夢神人  
示文書中一聯云如火烈：玉石俱焚在冬青：松栢  
不改至是秩滿當官上庠公徑赴部調靜江府察推地  
闕俱遠益知秦怒且信前夢也高宗更化垂召丁許國  
憂三十二年服除堂擬太學博士闕殆十年公復注靖  
州教授考滿改左宣教郎孝宗初年錢公端禮虞公允  
文同執政求中立不倚之士差公諸王宮大小學教授  
乾道五年供職輪對論官當擇人不當為人擇官上喜  
因御製用人論賜大臣六年除太常府寺主簿進太常



丞群臣爭畫策恢復公因對言漢高祖取項籍竒謀祕計史不得書今自治未効而大言釣美官者紛々謀國亦踈矣上然之公自登朝出公門入私門率數月隨衆一至政府未嘗有所求上察其賢七年擢將作少監八年兼權司封司勳即官九年進擬軍器監玉音以為允諸公益知上眷俄兼太子左諭德淳熙二年遷國子司業時議德壽慶典生員爭挾貴要求為大小職事覬需需思公與祭酒蕭之敏靖立格選差至今守之九月兼權起居舍人越三日復權中書舍人直前奏謝上曰卿質直無附麗故加親擢三年三月進起居即先是察官

闕朝論多屬公上以公不歷縣為礙格十二月起拜左司諫首言辨邪正然後可為治上及外臺耳目多不稱職公疏二人乃大璫甘昇都承旨王抃所主上即罷之一日復宣諭兩郡守不職公則辨其無他其不阿類此每對必言民力困窮冗費不節宜立經制量入為出又州縣官冗增負未已赦放逋負有名無實守令勸農反為農害京西不當益武憲輔郡不應用武守獎拔宜先循良後能吏上皆行之時中外無慮歲事屢豐議者復及進取上以問公曰賢否雜揉風俗澆浮兵未強財未裕正宜卧薪嘗膽以圖內治若恃小康萌驕心非臣



所知上曰忠言也公因勸上正紀綱容直言親君子遠小人近習有勞可賞以祿不可假以權上甚嘉納四年冬擢右諫議大夫入謝上曰卿論議鯁切不求名譽糾正奸邪不恤仇怨故制詞謂善不近名仁必有勇道上意也五年同知禮部貢舉有卿監暫權工部侍郎被酒自詭出曾覲之門公奏黜之夔帥李景孛恃援貪虐臺臣不敢劾公極力論之趙叅政雄奏公誤信景孛仇人令狐某之言捕治其人公併及趙上不得已閏六月徙公刑部侍郎懇辭不聽固請補外九月出知嚴州吏部尚書鄭丙侍郎李椿皆謂公不當去上亦悔之嚴地狹

財匱始至庫緡不滿三千公儉以節用不二年積至十五萬緡淳安縣務加額公付縣克版帳且為豁積欠數千緡屬邑俱寬先是宣和庚子方臘盜起甲子一周衆方疑懼適遂安令朶土兵廩給群言洵：公亟易令且呼卒長告誡皆感恩畏服城中惡少數十輩間擾市廛公密籍姓名埋補軍額人以按堵庭無留訟監司言狀上方新職名非功不予詔公治郡有勞特除敷文閣待制移知婺州父老遮道幾不得行其送出境者以千數娶與嚴隣熟公政不勞而治會歲旱浙西常平司請移娶粟於嚴公曰同路則可今東西分部不當與然舊治



安思坐視為請於朝上發太倉粟賑之八年冬召還公言江浙再歲水旱願下詔求言仍命監司通融郡縣財賦毋但督責而已除吏部右侍郎旋兼國子祭酒近例知閣官兼樞密都承旨或怙寵招權上思復用儒臣九年正月命公以龍圖閣待制為之公言債帥餘風未殄群臣進言非迎合獻諛則強辨邀譽當察誠偽虛實上稱善八月除權刑部尚書北使賀正旦充館伴使十年兼權吏部尚書明年兼侍講十一月真拜秋官典銓如故俄升侍讀公言命令不可數易憲章不可數改初官不許恩例免試今或徑令注授即却羨餘之獻今反以

出剝為名諸路錄問大辟長吏當親詰以防吏謾死囚數多乞如漢制殿最以問事多施行慶典丁錢減半亦自公發之經筵讀陸贄奏議至度支折稅市草事公奏聚斂之臣欲為欺誕必更制度如桑弘羊幹鹽鐵宇文融括剝田皆陰耗元氣上曰制度何可紛更天下本無事庸人擾之耳又讀論裴延齡書畢奏曰人君未嘗不欲去小人然君子常為小人所勝蕭望之困於恭顯在漢元帝不足責如唐明皇憲宗號明主而張九齡不勝李林甫裴度不勝皇甫鏞蓋小人善以智術惑主聽上曰小人須挾才鑄亦延齡之徒也公曰贄貶在貞元十



一年明年而延齡死殆非人力不然延齡相矣贊之言  
可為萬世戒上極稱善十三年七月正除吏部尚書十  
四年因早求言公列十事以進高宗山陵克按行使明  
年正月遂貳大政尋克思陵禮儀使畢事進官二等按  
行賜銀絹五百禮儀又五之二並固辭不受五月權監  
脩國史日曆十六年正月兼權知樞密院事倚注方隆  
而公自陳年且除資政殿學士與郡復請間改提舉臨  
安府洞霄宮辭日上有勉從卿去之語光宗即位詔書  
求言公手疏六事語甚剴切表乞休致優詔不允以紹  
熙四年二月二十五日薨明年十月己酉葬本縣鍾山

鄉上靈之原享年七十七積官宣奉大夫封豫章郡開  
國公食邑至二千一百戶實封三百戶特贈紫金光祿  
大夫娶同邑張氏某之女封大寧郡夫人通古今有賢  
行三男達某官進士唱名第四孝宗咨賞他日入謝上  
曰達才氣甚佳父子高科殊為卿喜遵某官兄弟皆賢  
而文其一天五女長不及嫁次適某官趙師烜前卒次  
適某官趙師燭次適某官劉若次繼室師烜孫男三人  
彖蒙承奉郎一尚幼公資性端醇問學精博持身玉雪  
論事金石聲色財利無所徇飲奕服玩無所好接物雖  
和然不可干以私常曰士大夫操履正乃能守道守官



若內有毫髮之愧臨事必掣肘古人謂受恩多難立朝諒哉惟其所得如此故安恬不競人不得而親踈孝宗深知之每稱其全護善類誠實不欺御書二十八將傳論以賜公之言事或有未契必反覆開陳退未嘗漏言薦進人才不市私恩在從班奉勅舉察官以今三衢丞相余公應詔上即用之其精鑒如此高宗初喪上未見群臣首引公及翰林學士洪邁語頗傳外公尋得政上對二府及之面獎公曰叅政周密必不洩也始終倚信豈偶然而已立朝三十年苞苴不至其門退歸鄉閭蕭然如寒素自號定齋居士闢小圃粗立亭館莩花竹制

度極簡朴鄉人名曰南園晚康強無疾其終也適清明薦享家廟退與子孫論文如常時有頃微倦就枕奄然而逝文集五十卷奏議二十卷外制五卷經筵講義二卷東宮講義五卷以子升朝遇恩累贈某官銘曰

古先哲王 真賢是任 任之伊何 必親必信

惟是良臣 以德復君 其德伊何 必忠必誠

明：孝宗 如日有赫 溫：蕭公 韞王之質

帝曰汝文 其代予言 又曰直哉 以繩我愆

迪簡疇咨 爰授之政 東府西樞 兼幹二柄

以輔以翼 謀焉孔嘉 有始有卒 音則不瑕



帝倦于勤 公亦歸止 燕頤故鄉 綏厥壽祉  
譽望之成 似續之興 以貽來世 不在斯銘

平園續稿卷第二十七

終

後篇闕

平園續稿卷第二十八

周益文忠公集六十八

神道碑八

丞相洪文惠公

逆

神道碑

嘉泰元年

公姓洪系出共工氏後避仇以洪易工三國有廬江太  
守矩唐有集賢學士孝昌五季自歛徙饒州樂平又七  
世始歸鄱陽隱德田間至公高祖士良力教子孫學愛  
瀟蒼山川而置倉為命其子曰他日葬我倉下青紫當  
不絕後十六年元豐乙丑孫彥昇果以進士起家事徽  
宗歷三院御史至給事中徽猷閣待制遂為大家公之  
曾祖諱炳贈少保妣紀國夫人何氏祖贈太師鄭國公



諱彥先給事弟也妣魯國夫人董氏後徙樂平之洪源  
父皓政和乙未進士任至徽猷閣直學士贈太師魏國  
公謚忠宣母魏國夫人沈氏公初名造字溫伯一字景  
溫後改名适字景伯幼穎異日誦書三千言忠宣公自  
嘉禾司錄應選使朔方公年十三已能任家事率五弟  
三妹奉祖母及母避亂歸饒母亡復過嘉禾食忠宣之  
祿日夜率長弟文安公遵次弟翰林學士邁種學績文  
至忘寢食用父出使思補修職郎監南嶽廟調嚴州錄  
事叅軍浙西提舉常平司幹辦公事紹興十二年與文  
安公同博學宏詞科宰臣進呈所試制詞高宗曰父在

遠子能自立可嘉宜與陞擢遂除勅令所刪定官後三  
年翰林公亦中選由是洪氏文名滿天下改左宣教郎  
入秘書省為正字才數月忠宣公歸自朔方以忠言忤  
秦丞相檜斥補鄉郡公亦出通判台州將滿而忠宣公  
散官謫英州台守觀望擬彈公文納當路轉示言者以  
為風聞坐免官往來嶺南供子職閱九年秦薨忠宣北  
歸亦道卒服闋起知荆門軍公才智有餘臨民惠愛二  
十八年應詔上寬恤四事凡公私以例取民錢歲數千  
緡悉除之郡父為盜區大比士附江陵試解額僅存五  
之一公作成日衆乞自闕試闕稍還舊額繼有登科者改知



徽州會鬻官田監司慕賞迫州縣公獨寬之初至訟析  
產不平者紛然公曰此吏求賂不印闕書之過也命人  
戶毋問早晚齋書庭下為立印給其訟遂絕為政得要  
類此范文穆公成大來為戶掾一見知其遠器勉以吏  
事暇則商推著述自是范公官業文筆高一世每德公  
云擢提舉浙江西路常平茶鹽會文安公守平江易江  
東路嘗兼提點刑獄蓋鄉部也持正不私風采振厲三  
十二年車駕視師金陵公因朝覲言本路昨旱荒民逐  
食淮甸復困虜兵今雖懷歸而田產官已斥賣不則給  
佃乞斷自二十八年後許業主若子孫用估價贖還天

語褒飾再三時翰林被命迎使客上曰洪皓三子皆可  
用也公于是歷陳邊防民兵積粟振民等事朝廷益知  
其才除尚書戶部郎中總領淮東軍馬錢糧孝宗即位  
海州解圍符離用兵供億繁夥公心計周密暇裕如平  
時會有旨犒海州之師鎮江及武鋒軍有實在園中而  
不與名公比附倍給以便宜招納海道逃卒歸之督府  
歸正者接踵而來或無以贍其家因公奏乃計口添支  
公謂官以總領淮東為名而財賦實隸浙西江東乞以  
兩路入衛後公登二府竟行其說迄今便之隆興元年  
就遷司農少卿明年召貳太常兼權直學士院又兼權



禮部尚書上初講郊祀公必進胙德壽宮及改定樂章  
汰樂工冗員人謂禮與時兩得之七月文安公罷西府  
公即求去上遣使賜茶諭令安職尋因夜直同右正言  
尹穡召對上稱公溫粹文詞有用論事可觀穡先頗睥  
睨公知上眷乃已九月除中書舍人內直如故湯丞相  
思退免侍御史晁公武論公草麻無謹責語公亟請外  
上曰公武言卿黨思退朕謂平詞出朕意固却其章仍  
徙戶部侍郎矣方羽檄交馳書詔填委或夜召或細札  
咨訪公獨當內外制時奉詔言事如乞防虞海道降  
詔親征多契聖心大用之意已定虜既講好首命公為

賀生辰使虜遣同簽書宣徽院事高副先接伴自言其  
父司空有德忠宣相與甚歡得其要領以歸乾道元年  
五月除翰林學士仍兼中書舍人大臣奏翰苑不應下  
兼掖垣上曰洪某在後省改職欲其整頓綱紀耳秦頊  
予祠公執不可上徑批依奏封以付公明日賜對宣諭  
曰卿論秦頊甚當雖朕意所向不可行者弟言之巫伋  
被召余堯弼復職莫汲為密院編修官公皆繳奏而止  
又奏免外制上曰執政有闕朕將用卿公因繳馬監崔  
良輔轉官乞令大臣討論賞典上極稱善且曰卿且執  
政自可討論六月遂除端明殿學士簽書樞密院事上



論叅政錢端禮虞允文曰三省事與洪某商量東西府  
始同班奏事公赴德壽宮謝高宗曰上議用卿吾謂從  
官中無踰卿者况卿父精忠古今所無頃欲登用阻于  
秦檜今卿兄弟相繼入輔此天報也八月以左中大夫  
叅知政事十二月拜通奉大夫尚書右僕射同中書門  
下平章事兼樞密使公自簽樞旬月入相感激異知任  
怨草弊以誠實不欺為主人人才可用疎遠不棄不然雖  
親舊弗予上每稱其心存公道進擬無不當公奏中書  
舍人蔣芾語臣無事可繳臣答云凡降旨云特者皆非  
法今一切無之上曰芾亦及此且謂特旨宜審公奏陞

下動遵成憲願思芾言益崇聖德上曰朕與卿等共守  
之駕幸白石教場閱三衛軍馬公前奏將帥有潛蓄鷹  
犬備狩獵者上即呼諸將戒諭初議召見郡守觀其能  
否公言舊惟見闕賜對今乞勿拘闕遠近並令半年前  
奏事之任遂為定制二千石多得人矣公自執政即奏  
減機速房吏三省密院毋留額外人有承旨司謝褒者  
力乞存留四人其子在焉公怒取旨編置政府久不治  
吏上欣然以為兄戶部事有稽慢公追主令治之侍郎  
林安宅上章請罪既又欲給度牒千道付廣東期一季盡  
鬻公請減半仍戒科擾安宅滋不悅馬軍司乞牛皮五



千餘為馬甲御前拋買五萬工部別得旨市十三萬公  
奏數多限迫上曰軍器所妄計是使人殺耕牛也茅買  
一萬而已中批朱彥宗知婺州公言此資善堂翊善朱  
震之子雖可與郡然彥宗娶潘氏乃婺州長公主家遂  
改泰州二年殿中侍御史張之綱論陳宗霖當與差遣  
而潛附所厚華初成于其中公發其姦上視初成履歷  
曰屢放罷又嘗停官且年已及豈應與郡卿敢及臺諫  
可見無私朕終夕為之喜劉貢初除監察御史公贊上  
得人會術士薛言中同貢子為人求官于樞密使汪澈  
汪送有司上未知也早朝上稱貢治能治錢塘寄囚已

批出遷殿中公與執政及薛言中事且云除書未啟當  
封還上曰卿等如此無隱向來宰執所無之綱尋以憂  
去貢遂罷方士皇甫坦謁公：薄其禮坦怒云：責之  
曰君誠有道胡為出入宮禁妄談禍福耶明日公奏通  
國以神仙待坦陛下謂坦何如上已知公責坦笑曰頗  
能布氣治病昨日宮中賜酒醉語已無倫矣公既疊忤  
言路適林安完為諫大夫或勸公引避公曰吾與安完  
異同國事也上知吾忠豈可患夫逆為去就乎適春霖  
公引咎乞退上曰春自多雨卿茅安心安完遂與臺官  
合辭論公上不聽安完至家居待罪公亦力請上不得



已三月辛未除公觀文殿學士提舉江州太平興國宮而謂叅政葉顥曰宰臣奉法守公誠實不欺無如洪某重違言者耳不數月起知紹興府浙東安撫使治得大體復勤小物軍民安之閱歲有半提舉臨安府洞霄宮時翰林在西掖上語之曰賢兄三請祠姑聽暫間公素不營產業自越歸得附郭地百畝因列岫雙溪之勝位置臺榭引水流觴種花莸竹命曰盤洲一椽一卉題詠殆徧安居十有六年身名俱榮子孫滿前近世徭福鮮及公者淳熙十一年辛酉薨于正寢前自撰遺表上之享年六十有八爵鄱陽郡開國公食邑五千二百戶食

實封二千四百戶初贈特進諸子遇恩累贈太師魏國公娶沈氏太學博士松年女追封魏國夫人母夫人之姪也先公五年薨葬郡東四十里徐村之源公為墓銘效漢人立雙闕因自作小傳俾後人刻其上明年三月甲申諸子奉公柩合葬焉男九人長槻朝請大夫新知贛州江南西路兵馬鈐轄次杻朝請大夫新知南劍州摺早亡樛朝散郎新權發遣長寧軍攢朝請郎前軍器監主簿桴故承事郎楹朝奉郎新知慶元府定海縣棟早亡招通直郎前權簽書判門軍判官廳公事女三人長早卒次適通奉大夫同知樞密院事許及之女前卒



次通朝散大夫兩浙西路提點刑獄公事薛紹孫二十  
三人倬承議郎江南西路提點刑獄司幹辦公事儼故  
承事郎知常德府龍陽縣丞及奉議郎荆湖南路提舉  
茶鹽司幹辦公事思承事郎新知江州瑞昌縣僚承事  
郎補承事郎新提領建康府戶部贍軍酒庫所幹辦公  
事僑侯侃承務郎新監建康府戶部大軍庫門僕承事  
郎新權簽書漢陽軍判官廳公事傳將仕郎佃佃仔俅  
儉傳承事郎新監蕪為軍崑山鎮伉俊仁倣承務郎倣  
俟女孫十二人適文林郎前廣南西路轉運司主管帳  
司楊汝明脩職郎新蕪為軍巢縣主簿權當國通直郎

兩浙東路提舉常平司幹辦公事張履信鄉貢進士陳  
洋承務郎張燧將仕郎邢諤將仕郎王待問進士高倣  
迪功郎新信州弋陽縣尉王元春餘在室曾孫男五人  
芾蘊蘭將仕郎遠荀女一人公器業早成與人交誠實  
無浮禮文華天賦濟以力學步驟經史新奇富瞻兄弟  
鼎立自成一家罷政後論著益多四方傳誦有盤洲集  
一百卷耽嗜隸古為纂釋二十七卷隸續二十一卷屢  
加刪潤合為一書將踵歐陽文忠公集古錄趙明誠而  
下弗論也某早與文安及翰林同朝公由常平入對始  
識公又嘗與贛州為僚金陵故其子孫以副樞許甥狀



請碑墓道先是太常以文惠錫公名文固然矣壬辰夏  
予奉祀過饒適連年水旱流移系道公宗支繁庶或不  
自給人言相君調我且及恤貧已責事甚詳矣居家  
均惠若此在公固可知矣遇蔭補捨長孫密奏表弟沈  
自強酬渭陽之恩命下乃知是皆宜書銘曰

思文孝宗 雲漢章天 有臣洪公 優于代言

孝宗神武 志平醜虜 公踐帷幄 言整軍旅

帝方克勤 如日運行 公總衆職 甚稱上心

帝推至公 天無私覆 相業伊何 才能是授

謀皆予同 惟德乃知 周旋二府 僅越三時

保釐東郊 注想未智 歸心浩然 何待奉計

榮名燕居 十有六年 為而不恃 五福天全

燁：斯文 振：厥後 詩以聲之 公乎不朽

左中奉大夫敷文閣待制特進林公保神道碑

嘉泰二年二月

高宗皇帝既通好北虜思與兆姓休息擇端良學識之  
士布列庶位故敷文閣待制四明林公行安節和特被  
簡知久貳制官引疾奉祠考終于家其葬也鄉老何寺  
丞涇嘗狀其事實而出處行誼則載實錄惟是墓道之  
碑闕而未備後五十餘年其孫都大提點坑冶鑄錢祖



洽以使事過廬陵謂其嘗官太師夙知公賢且契好不薄固以為請久之乃克如約惟林氏出殷比干比干既沒子堅逃難長林遂命氏為晉永嘉亂渡江家泉南至本朝為今慶元府鄞縣人曾祖復祖彥臣父延之俱不仕父以公貴贈正奉大夫公諱保字芑民政和二年登上舍第調迪功郎舒州宿松尉兩從廣西帥辟主管機宜文字是時方郡縣蠻境將士稍悖平民冒賞公覈正之全活為多武吏注闕泛濫公為立三等校試法改奉議郎南丹州策勳擢本路提舉常平或疑資淺改倅桂州丁母碩人石氏憂詔復以帥幕起公固辭服除通判

汀州移疾主管亳州明道宮及江州太平館起知興國軍改提舉兩浙及廣南市舶皆不拜累轉朝請大夫家居十餘年安貧著書嘗評論夏少康迄唐肅宗得失號中興龜鑑上之勅書褒答賜服金紫紹興七年高宗命左司諫陳公輔密薦學術議論用心忠直可備臺諫者公輔首奏公問學淵源持論不阿操守可觀是夏召赴都堂審察秦丞相檜止除提舉江東路常平茶鹽徽之休寧縣因變法季增鹽五十八萬公請以比歲中數為額邑人德之九年入為國子監丞公言郡邑上丁釋奠十哲侑坐今大成殿惟設顏孟又上戊享武成王不應



廢牲牢止用棗脯二籩而無配享其後禮官並請從公  
言仍增管仲至郭子儀十位配坐在職二年朝論推其  
靖共擢尚書比部員外郎十一年八月輪對九月升郎  
中初公居間修定鄉飲酒儀至是增損其制以聞尋詔  
鏤板頒行轉左朝議大夫十二年克省試叅詳官七月  
遷吏部郎中十四年三月進左司郎中俄兼中書門下  
省檢正諸房公事是時修定郊祀講大朝會禮文交舉  
命公兼太常少卿人咨其博前此銓曹都司例謝客不  
敢可否事公獨振舉滯淹雖休沐猶引驗文書吏不得  
以微文沮升改者惟秦蜀頃用便宜遷轉偽冒公設科

條盡革其弊嘗獲詐官法當賞公曰職也卒不言上重  
交隣歲擇卿監可任侍從者付以使指八月特賜對除  
權吏部侍郎假本曹尚書克金國賀正使初顯仁皇太  
后南歸沿塗應奉權增頓次自後南北修聘往來輒循  
其例又有請起兩淮稅者公使回具言淮民凋敝狀頓  
既復舊稅議亦格上眷方厚十五年冬引疾請去除敷  
文閣待制提舉江州太平興國宮者再公謙恭清約存  
心忠厚惟嗜讀書雖老不倦鄉黨儀之積官左中奉大  
夫十九年四月甲寅卒于正寢享年七十有一十二月  
庚申葬本縣龍山之南妻令人李氏前卒累贈普寧郡



夫人遂以合葬遺表聞贈左正議大夫子升朝累贈特  
進爵西河縣開國子食邑五百戶公文辭雅實似其為  
人有集三十卷二子勉終承直郎監行在文思院上界  
門劬終朝散大夫新知南劍州七女長適朝奉大夫江  
西叅議官董昌裔次未嫁而次適宣教郎史純臣早  
世再適迪功郎主湖州武康簿吳曦次適朝請郎知興  
國軍陸流次適承議郎司農寺丞柳綸次適奉直大夫  
前江西提刑陸洸次適進士劉汝霖孫四人長祖洽也  
今以戶部郎官總領湖廣江西京西財賦次祖壽早世  
次祖昌登仕郎次祖坦修職郎紹興府會稽縣主簿亦

早世孫女四人長適朝奉大夫主管成都府玉局觀陸  
杞次適通議大夫充敷文閣待制史彌大次適進士吳  
傳次適從政郎紹興府上虞縣丞樓潭曾孫六人岳宣  
教郎知台州仙居縣宓迪功郎監泰州丁溪鹽場岡從  
事郎新監臨安府新成縣稅宓習舉業庚將仕郎康尚  
幼曾孫女三人長適儒林郎嚴州支使錢萃次適奉議  
郎知江州德化縣陳卓次未嫁銘曰

紹興中葉

兵休衆熙

穆：聖皇

垂拱無為

旁招吉士

賢任能使

入從出疆

匪廢常比

孰端其身

而濟其文

倚欽林公

允也其人



迪簡在庭 靖共所蒞 歸安故鄉 終始無愧

德蓄于躬 裕乃後昆 克對無羞 英：孝孫

既念爾祖 亦鴻厥慶 揭辭墓門 永矣傳信

朝議大夫工部尚書贈通議大夫謝公諱神道

碑 嘉泰二年

孝宗皇帝知人善任使每擇恬靜正大之臣為諫官御史而宿其業常曰學術正則議論正議論正則是非公必不修睚眦之怨訐曖昧之過厥有大姦大佞為時指名則仁者之勇其肯舍諸彼徒以擊搏為能指摘細故豪強未必鋤善類或被害矣其父侍左右熟聞聖訓今

觀故煥章閣直學士謝公舉世稱為君子長者其問學淹貫內宜為儒林之官忠信慈惠外當付以民社然自監察進殿中歷侍御史遂拜右諫議大夫以遺光宗為御史中丞六七年間陳善閑邪遏惡揚善如漢孝文時議論寬厚耻言人過失化行天下此孝宗用公大意也公諱諤字昌國臨江軍新喻縣人其先叔方唐初為洪州都督因家高安元和中有名華者徙居新淦十世孫懋及其季歧子舉廉世克元豐八年同榜登科號臨江四謝舉廉字民師蘇文忠公嘗與書論文即公四世伯祖也曾祖臻祖誠俱有隱德世居新淦父華修身樂道



號清風老人大觀中始徙新喻以公貴贈中散大夫母  
胡氏贈淑人公幼敏惠急愨日誦書千言為文立成紹  
興二十七年第進士以左迪功郎調峽州夷陵縣主簿  
未上撫之樂安多盜監司檄公攝尉公條二十策大要  
使其徒相糾而以信賞隨之群盜果解散三十一年至  
夷陵適金虜渝平諸軍往來境上選行縣事有治辨聲  
三十二年覃恩循左修職郎用舉者陞左從政郎移吉  
州錄事叅軍因死給櫬自公始陳氏詐其僮竊財匿民  
家辭頗過實帥龔公茂良欲坐以罪公列其不然帥由  
是知公乾道四年廬陵艱食飢民萬餘守譙門求賑廩

官吏失措公亟植五色旗分部給糶頃刻而定其後江  
西再旱帥命攝屬徧走郡邑凡用粟百萬斛而戶口獲  
濟者百萬益公素以仁民愛物為心故臨事如此七年  
改左宣教郎知袁州分宜縣：負郡欠十萬緡公請蠲  
除于上司會丁母憂後令許樞密及之申前說時公已  
在言路為之助併秀之華亭縣月椿重額皆得減免淳  
熙五年求主管台州宗道觀以便養親明年丁父憂八  
年朝士推薦者多入幹辦行在諸司料院九年夏除國  
子監主簿十年春遷太學博士俄擢監察御史公素患  
差役不均居鄉勸民買田充義役至是婺處二州偶行



之詔下其法諸路或以為疑公力陳其便湖州安吉縣  
稅絹許用麤絲名曰屑絹有司請却之公言邑既輸絲  
又織綾夏稅已重故相乘除宜如故上並從之十三年  
九月為副端言士大夫習不恤而背理習徇私而背公  
習貪恣而廢廉謹習刻薄而鮮寬厚習汰侈而耻節儉  
習輕率而昧詳審習詐偽而罕真實習隱蔽而忘忠純  
如成湯制官刑以儆之十四年升臺諫適淮浙夏旱公  
條政事十二失畫振濟七策天子嘉納十月入諫垣明  
年冬兼侍講公奏帝王之學稽古為先六經皆古也而  
書為先可證後世得失上曰人君不知學則自怠如唐

太宗功非不高恨不知學使能以書證得失豈復用兵  
高麗乎公又言事無大小在乎立本揀弊而已帝王樂  
聞善言稽古不倦正為二者陛下每言允執厥中蓋中  
則不倚自然本立而弊除上曰所貴乎中無過不及朕  
最喜伊尹傳說所學得事君之道公曰伊傳固然非成  
湯武丁信用之亦安能致治公于啟沃大率類此嘗因  
夕對及邊事上有乘機會之諭公曰機會雖不可失亦  
戒輕舉上再三稱善一日與公論性上曰朕每愛孔子  
性相近及上智下愚不移之說簡而易明知卿嘗從邵  
雍于此似有得豈曾見程頤乎公奏雍父忠孝嘗侍



順時雍尚幼蓋得其傳于父耳初雍已封冲晦處士于  
是加賜願正先生十六年春光宗登極公獻十箴一曰  
業難成而易敗宜兢兢保之二曰道甚簡易在尊所聞  
三曰畏天之威四曰存心公正五曰賞罰不可妄 六  
曰獎廉戒暴七曰訪民疾苦八曰理財以義九曰姦諛  
生亂甚于夷狄十曰自治乃可理外又論治天下必有  
家法為長久之道又乞舉人望以聳動中外又論二節  
三近宴飲妄費二節也執政大臣舊學名儒筵列職  
三近也上悅四月遂進中執法會補闕薛叔似拾遺許  
及之並移卿監公言壽皇復置此官用意甚遠今名遷

而實廢非新政所宜頃之徙權工部尚書力請去以直  
學士知泉州又辭遂提舉江州太平興國宮凡歷三任  
紹熙五年十一月九日以疾卒享年七十有四官至朝  
議大夫娶胡氏封淑人內助為多二子峴通直郎新江  
淮等九路都鑄錢司檢踏官峙早沒三女適進士丁南  
容胡定彭燭伯孫男四人淮迪功郎新筠州高安縣尉  
渭漳灃皆登仕郎孫女三人長適歐陽珙次許胡逢吉  
一尚幼公孝友慈祥助以學力每志于仁勇于義躬自  
厚而不責于人事親養志無違教二弟義兼師友諾亦  
中第豐城孟程筆力豪俊公誨之曰詩詞特遊士之雄



耳程即易業登科問道請益者屢滿戶外公隨其材器  
勉使成立姻戚交舊處之合宜疾病死亡隨力周恤後  
生求詩文筆札應酬不倦人：滿所欲而去初居縣南  
之竹坡榜曰良齋晚徙邑東竹木參天巖挂尤多命曰  
桂山二名聞于中外予在從班嘗被旨薦士及公姓名  
上遽曰是所謂良齋耶予問陛下何自知之上曰朕見  
其性學淵源五卷而得之耳公平生著述至多有良齋  
集四十卷論語詩書解各二十卷春秋左氏講義三卷  
栢臺諫垣奏議各五卷經筵總錄三卷其它如金石庵  
類稿鈐罔約卓筆隱堂記自嬉集楚塞叢稿雲根叢稿

樵林機鑿南坡學林天上詩稿江行雜著景符堂文稿  
尚數十編嘗進孝史五十卷詔付祕書省公量宏履坦  
行以忠恕待減獲怡顏和氣皆得其歡心每語人云吾  
自得願正先生簡易之說用之不盡益亦天性也葬以  
慶元：年十一月甲申在袁州分宜縣神龍鄉鍾山里  
先塋之側其子以公高弟宣教郎新知衡陽縣歐陽朴  
所述事實求寶文閣待制楊公萬里表公之墓凡文章  
行誼登載已詳鄉人又曰螭首龜趺刻為歌詩以詔來  
世法也復使來請其銘曰

舜遠不仁 咎繇是翊 舉直錯枉 枉者自直



念昔淳熙 于古若稽 公任臺諫 欽藏角圭  
言忠謨嘉 可獻否替 彼激以訐 視之何細  
司直于朝 消伏兇共 簡易之學 始終頤雍  
展也醇儒 其儀不忒 詩廟諡工 亦彰聖德

平園續稿卷第二十八

終 中國第二篇

平園續稿卷第二十九

周益文忠公集六十九

神道碑九

寶文閣學士通奉大夫贈少師梁公 汝嘉神道

碑 嘉泰三年

高宗初元自 幸揚而周旋江浙然後定都臨安當是  
時忠足以尊君親上才足以撥煩治劇論思則援古證  
今治郡則知所先後如戶部尚書梁公誠所謂國家之  
寶臣不可以無傳也公諱汝嘉字仲謨處州麗水縣人  
曾祖訥祖佐俱有隱德父文林郎固贈光祿大夫妣普  
安郡夫人何氏公幼敏悟讀書不捨晝夜外王父清源



郡王何丞相執中奇之奏補登仕郎初以迪功郎主管  
吏部官告院三被賞循儒林郎調中山府司兵曹事減  
負改儀曹每以不可開邊釁為言帥怒劾奏未報虜兵  
薄境委公持御香祝版祠北嶽歿陷公死地公蹈履艱  
危禮成而返用舉者改京秩嘗辟燕山府路帥屬議論  
不說隨帥不悅公求還京師俄丁母憂營葬常州因家  
焉靖康初服除就選知武進縣乙酉二月壬子六飛蒼  
黃南渡甲寅次常官吏駭散公獨不去上異之領大將  
張俊刻姓名于御劍郡人張文靖公守方在朝亦誦公  
治縣功升通判州事九月加直秘閣增俸濬隍陰為賊

備俄戚方來寇郡守周杞將遁公固留之賊退遷秩一  
等既而虜騎大至杞退保宜興部民數萬倚公安集特  
遷承議郎未幾擢提舉本路茶鹽公事紹興改元夏漕  
臣請令亭戶輸二稅物斛佐邦用公言民煮海代耕故  
皇祐著令估價錢以優之驟變法必將逃亡大失國課  
公私受害詔從 法二年春除兩浙轉運判官又陞副  
使兼權臨安府市皆發舍數火公始陶瓦易之三年七  
月進直龍圖閣正知府事首繕庠序以示風化虜遣使  
來適殿柱壞詔亟葺治公心計有餘凡梁柱竹木瓦石  
丹漆皆度廣狹高下素為儲侍一夕告成上自宮省下



至營屯及百司官解區處悉有方始成都邑上諭公曰  
前改宋輝俗而懶盧知原繆而執今得人矣四年特除  
徽猷閣待制俄進戶部侍郎仍兼臨安公以共二辭五  
年春進顯謨閣直學士知府事初浙西安撫使移隸京  
口至是改付公遂為定制六年秋謀報劉豫挾虜入寇  
上將幸金陵疑用度不足公以辨告遂為隨駕都轉運  
使兼浙西沿海制置使七年春再為戶部侍郎領漕如  
故九月請外以寶文閣直學士知平江府八年正月駕  
還公請便郡初移台州旋易婺州復以戶部侍郎召金  
人議和樞掾胡忠簡公銓上書得罪公與侍從六人同

對謂虜情難測後必背盟禮不可過又言責誣太重奏  
稿多出公手上不以為忤當路始不樂會言者謂祖宗  
時常平總于戶部今以諸路茶鹽司分領但置主管官  
一員為之屬金穀陷失以此又發運使本通融六路財  
賦致之中都今乃設經制發運使歲給糴買錢數百萬  
失回易市易贍軍等錢至千萬緡二者皆狗名失實九  
年二月詔改發運為經制司而提舉茶鹽勿兼常平擇  
戶部長二一員併領之諸路主管屬官各為經制某路  
幹辦公事公遂兼江淮荆浙閩廣經制使三月進權太  
常伯兼詳定一司勅令上擇象簡而賜公示大用意時



相諷言路排擊雖報聞而公不自安力求去秋以舊職  
提舉江州太平觀十年冬起為川陝都轉運使公前謂  
虜必渝平懇辭已而果然東京留守孟庾降上謂侍臣  
曰庾不可任惟梁某為朕言之知平江府兼浙西沿海  
制置使輟御前金器以賜至則一新學宮巨木浮海而  
至適中大成殿梁士民嗟異十一年明州妖僧法恩作  
亂選公經守仍兼浙東沿海制置使過闕升寶文閣學  
士上嘗密以千文號付公有所見勿拘遠近實封直達  
公感激恩遇知無不言前後條上便宜如分命諸將控  
扼要害收陝西戍兵以固全蜀論歸正人不當遣至謂

大臣措畫失宜為諸將所輕願出宸斷毋失事機胡世  
將雖專任川陝宜擇人副之又乞分大軍為三一據地  
利一往來策應一留視營寨使虜常為客我常為主又  
奏用張俊韓世忠岳飛于西府劉錡守荆南皆奪其兵  
無復進取之計上每嘉納踰歲請祠歸明年秋知温州  
未幾夏潦公竭力振恤併奏江浙閩皆大水願降德音  
蠲租稅仍勅有司省不急以補經費十五年四月彗出  
東方乞下詔求言皆中外喋莫敢及者十六年正月移  
知宣州悼止乞祠從之自是凡再任太平宮二十一年  
起知鼎州再歲復引疾奉祠二十四年十月二日薨于



里第言年五十九越明年十月丁酉葬松陰縣惠洽卿  
之原階自宣教郎年勞賞典積至右通奉大夫致仕贈  
右宣奉大夫諸子升朝累贈少師爵自麗水縣男至縉  
雲郡公食邑自三百戶至二千四百戶實封百戶公識  
慮絕人行以忠恕內更劇曹他人膠擾公獨整暇外歷  
八郡人安其政上用公意殊未已不幸位未克滿能亦  
弗克壽議者至今惜之夫人葉氏同郡處士俊之女與  
公共歷艱難同留武進名聞禁中心無妬忌稱于族黨  
子十一人從事郎伯瓌承事郎仲璉朝奉郎叔玠朝請  
大夫季珩宣教郎季璆宣義郎季琦奉議郎季璠朝請

郎季璋吏方文采多濟世美季璵季璠不及仕今惟季  
秘以朝請大夫尚書戶部郎中總領淮東軍馬錢糧孫  
一十七人其知名者仲申終宣教郎知明州奉化縣舒  
終從政郎興國通山縣令叔括登進士第終迪功郎溫  
州樂平縣主簿錯紹熙甲科終文林郎衡州學教授  
銓迪功郎新楚州益城縣主簿鉅太學生鎰鄉貢進士  
鉞迪功郎信州上饒尉鎮修職郎旌德尉鑰迪功郎新  
饒州安仁尉銖將仕郎曾孫二十人元孫三人某將仕  
郎公篤于友愛與其弟未嘗相捨收恤孤甥畢其婚嫁  
力教子孫儒風彬其興殆未艾也既沒五十餘年豐



碑未立季子戶部君方為時用乃以故叅知政事辛公  
次膺所撰誌銘及家傳屬其緒次昔我先太師秦國公  
早與公游某以孤童宦學未成已知公譽望在人公亦  
間從諸父訪先公之後竊有感焉暨某立朝議識公諸  
子追懷先契其何敢辭乃質之史氏叅憶舊聞為之銘  
曰

瀕洞風塵 牧守跳犇 公一令耳 心存至尊

節錯根盤 鋒銳必礪 公處其間 雍容允濟

才難固然 知德尤艱 公議人事 誠心每殫

訟理政平 已曰循吏 公歷郡國 儒飾吏事

維西有樞 謂公往諧 命乃在天 夷燹辰階

知公于初 紀德于晚 據實刻辭 其尚行遠

史館吏部贈通議大夫朱公松神道碑嘉泰三年

祖宗時擇儒學為館職自館職擇侍從由侍從擇輔相  
所謂儒學者明仁義禮樂通古今治亂其議論可與謀  
慮大事決疑定策文章特一事耳治平中歐陽文忠公  
在政府奏疏如此尋命宰執各薦士其效見于元祐之  
際高宗方內修外攘首置秘書省以儲人才他有司治  
事日不暇給獨職館涵養從容要路闕必由此選國朝  
盛舉乃復見之新安朱公益其一也公諱松字喬年世



家婺源曾祖振妣汪氏祖約妣汪氏父森常曰吾家五世積德業儒當有顯者後贈承事郎妣孺人程氏公生以紹聖四年兒時出語驚人未冠力學由郡庠貢京師文體清新耻于蹈襲政和八年上舍登第以迪功郎調建州政和尉丁父憂服除再調南劍州龍溪尉監泉州石井鎮詩名聞四方他文渾涵流轉惟意所適然謂于道為遠益取經子史傳考其興衰治亂欲應時合變見之事業又因師友浦城蕭頴子莊劍浦羅從彥仲素而得龜山楊文靖公河洛學問之要拳服膺每疑下急害道取佩韋之說名齋自警在尤溪聞靖康北狩大慟

幾絕自是奔走卑冗假祿養親無仕進意紹興初監察御史胡世將撫諭入閩公袖書告之曰今不自荆襄赴興元結夏人控引五路東嚮爭中原則當幸金陵固守荆淮奈何局促一方徒費日月竟將何為世將竒其才歸薦于朝會前執政謝公克家守泉南亦路章薦公學問不宜滯筦庫遂召試館職策問中興難易公乞順人心任賢才正綱紀累數千言辯論精博高宗嘉賞除祕書省正字四年二月循左從政郎趙忠簡公以元樞都督諸路軍馬約公入幕公以親疾辭尋丁母憂七年服闋上已進都金陵九月再召對公勸上抗志高明垂精



延訪求經遠持久計遂言中興之君惟光武克濟大業  
可以為法元帝肅宗志趣卑近宜以為戒上明日對輔  
臣稱善且謂光武無可議肅宗雖優于元帝然虧人子  
之行于其終焉為可恨也特改左宣教郎除校書郎是  
時呂祉代劉光世統軍淮西鄴瓊擁眾叛去廟論欲斂  
兩淮戍兵衛行都公率同列疏言不可亦會虜疑劉豫  
得叛兵不可制執而廢之當路不能乘機會乃亟還臨  
安八年三月遷著作佐郎御史中丞常同薦公可任大  
事四月復賜對公言國論不過兩端進取者失之踈玩  
惰者失之媮惟自治觀釁為上策願陛下並進忠賢修

明紀律革姑息振國勢虜不足平也上悅擢尚書度支  
員外郎兼史館校勘刊修蔡卞所改哲宗實錄公用力  
為多歷司勳及吏部員外郎史職如故實錄成遷左奉  
議郎磨勘轉承議郎趙忠簡公罷相秦忠獻公當國決  
意講和公與史官胡珵凌景夏常明范如圭合奏陛下  
以梓宮母兄天屬未歸不憚屈已和戎曾不思項羽置  
太公俎上邀高祖高祖知其詐日夜思所以戲羽者彼  
兵疲勢窮太公自歸此今日龜鑑也秦方惡公異議秦  
知政事李莊簡公又力援公屬虜使再至許歸河南地  
公請用漢制命廷臣雜議又言二三大將握重兵將有



尾大之患請復武舉儲將帥選驍勇補周衛擇守帥壯  
藩維興太學明大倫以倡節義規摹大率類此秦滋不  
樂諷言者論公懷異自賢出知饒州十年春己未上請  
主管台州崇道觀和議俄變秦蒼黃不知所措有郎官  
代作自解之奏曰伊尹告成湯德無常師主善為師臣  
前贊議和今請伐虜是皆主善為師如其不濟則陳力  
就列不能者止當遵孔聖之訓秦大喜擢郎官為右史  
而不暇問所引皆誤也是時秘書省寫法慧寺或大書  
于門云周任為孔聖太甲作成湯秦大怒疑出于館職  
相繼汰去而引用其黨公遂不可出矣祠滿再任命下

而卒十三年三月辛亥也享年四十有七公性孝友于  
朋友重然諾不以死生窮達易其志誘進後學揚人之  
善凡邪佞鬼瑣鄙薄之輩不與交秦薨異時名士柳暹  
竄逐者悉起為大官獨公無年識者惜之其將終也手  
書與所善胡憲原仲劉勉之致中劉子翬彥冲屬其子  
燾使往受業其後遂以與學高文推重當世今上聞其  
名以待制侍講禁中累贈公通議大夫初公卒之明年  
葬建寧府崇安縣五夫里西塔山勢頗卑下乃卜慶元  
某年某月某日遷葬武夷鄉上梅里寂歷山中峯僧舍  
之北公嘗賦詩有鄉閭落日蒼茫外尊酒寒花寂歷中



之句茲其識乎待制以其先太師與公為同年進士故  
 來請銘公娶同郡祝氏處士確之女贈碩人事姑孝謹  
 待內外姻親和順得其歡心後公二十七年卒別葬建  
 陽縣崇泰里後山鋪東寒泉塢一男熹也女嫁瀏陽丞  
 劉子翔早世孫男三長塾已七次塾將仕郎次在承務  
 郎女三人脩職郎劉學古迪功郎黃榦進士范元裕其  
 壻也曾孫男五人鉅鈞鑑鐸銓女九人長適文林郎趙  
 師夏餘未行公平生所為文有常齋集十二卷行于世  
 外集十卷藏于家吏部侍郎徐度自言少多與前輩游  
 迨識公及張戒拉定夫始得為文之法欲為公集序未及

成而文士傳自得實為之謂公詩高潔幽遠其文溫婉  
 典裁非溢美也公母弟捍亦負軼才不肯俯仰于世有  
 詩數十篇高遠近道號玉瀾集云銘曰

信道惟人 窮理以書 合而一之 乃曰通儒

表：朱公 邁往于初 師友淵源 名實允孚

蘭臺史觀 卿才是儲 有昌其言 有宏厥模

人雖我抑 豈無後圖 高皇更化 群賢畢趨

公則逝矣 齋志弗紓 幸哉有子 播獲菑畲

追爵黃散 肇營新墟 揭以銘章 永鎮龜趺

資政殿學士中大夫叅知政事贈太師李文敏



公配神道碑 嘉泰二年

濟水貫兗與徐居古九州之二其在四瀆得天地質信  
寬徐之氣其澤曰大野是為十藪之首鍾英炳靈今于  
故叅知政事文敏李公見之始以淵源之學華重之文  
藻飾王度中以剛大之氣扶顛持危晚以超卓之見居  
安資深允所謂間生之賢者也公諱邴字漢老系出唐  
郇王禕其十一世孫濤仕五代為相入本朝歷兵部尚  
書生水部郎中承休公高祖也水部生廣文館進士贈  
兵部尚書諱仲寶加贈太子太保者公曾祖也宮保次  
子諱景山官至駕部郎中贈太子少傅兩娶蘭氏贈咸

寧郡夫人公祖父母也朝請大夫諱瑒贈少師公父也  
娶仲氏鎮國夫人孔氏鄆國夫人高魯皆葬濟陰伯祖  
殿中丞景圭及宮傅葬濟之任城故公為濟州鉅野縣  
人幼警敏喜讀書弱冠能文伯父樂靜先生昭玘嘗從  
眉山蘇文忠文定公御史中丞孫公覺門下侍郎李公  
清臣講論文章仕至起居舍人性靜厚忠實其文演迤  
貫理穩審不露斷削公獨得其傳宗寧五年登進士第  
授將仕郎德州平原尉上官待以異禮秩滿升從政郎  
濮州鄆城丞外艱服除執政知其名用為編脩國朝會  
要所檢閱文字宣和初以儒林郎特除祕書省校書郎



改宣教郎二年十月擢尚書禮部員外郎時中外奏祥瑞無虛日公草賀表筆不停綴精確典麗三年夏進起居舍人是冬以通直郎試中書舍人賜服金紫五年七月遷給事中閏月權直學士院陳橋顯烈宮成特命公撰文刻石明年八月入翰林為學士徽宗曰內外制得卿稱職矣高麗入貢選充館伴會召宰輔親王貴戚宴睿謨殿賞橙橘侍從預者總四五人而公在焉詔賦紀事詩公垂館客夜草百韻以進上大喜遣中使持示麗人麗人表謝乞傳本以歸凡私覲悉加等適蔡京再領三省言路觀望適公作大晏樂語盛稱鎮圭為罪黜提

舉南京鴻慶宮七年冬除徽猷閣待制知越州為政清簡抑強扶弱欽宗覃恩轉承議郎詔諸路兵備胡公擇掾屬通明者付以調發城中至不聞兵出議者猶論公前因時宰驟進而不知主眷素厚也坐落職提舉西京嵩山崇福宮高宗初年復右文殿修撰踰年召為兵部侍郎再直學士院三年二月壬子車駕南渡壬戌至杭州三月癸未苗傅劉正彥反露刃宮門上登樓撫諭公亟趨前叱責傅等虎焰稍息又諭殿帥王元擊賊元唯唯公扣宰相朱勝非問計策傅等皆在公反覆鏘詰人為公危公無懼色退勸勝非密引外援制賊又謂傅所



聽者正彥正彥則倚王世修為謀主宜陽許世修侍從以間之蔑不濟矣太后垂簾旬餘勝非遂奏變故以來從官能助朝廷者惟李邴鄭穀協心于內誦言于外乃除公翰林學士穀御史中丞呂頤浩張浚劉光世等義師起公與權直院張守分撰請復辟表及批答丙午勝非白太后除公與穀並為端明殿學士同簽書樞密院事四月戊申朔上御朝明日遷公尚書左丞自朝散即例轉中大夫公懇辭上賜親札略曰卿毅然正詞氣折亮醜萬衆動色具臣覲顏公謝表亦云謀寢淮南雖慙素望笏擊朱泚實厲壯心詰責克渠激揚禁衛迨

成復辟實與秘謨益出孤忠豈微後福當時稱為實錄乙卯大赦其文云斷鼉立極開辟功成取日授龍神明御正亦公所草四方誦之駕幸江寧六月依祖宗舊制合三省官改叅知政事尋以防秋分六宮百司奉太后如洪州命公為資政殿學士權知行臺三省樞密院事公與相臣呂忠穆公議論不協臺諫有向背意公聞之固辭八月仍本職提舉洞霄宮上念公不已未閱月起知平江府視事三日復從請祠兄鄴帥越失守連坐落職明年復端明紹興元年大禮還舊職十六年五月甲午以疾薨于泉州居第之正寢享年六十有二遺表聞



贈正奉大夫八月庚申葬南安縣石鼓山之原爵隴西  
縣開國男食邑四百戶妻東平郡夫人任氏朝請卽立  
之女前七月卒五子縝警悟絕人不樂仕進號萬如居  
士有梅詩百篇終朝請大夫侍講朱熹揭其墓維宣教  
卽贈朝奉大夫紀疾廢綸朝奉大夫糾承議卽贈朝請  
大夫五女長適朝奉大夫直秘閣傅自得次適左迪功  
卽趙如川再適朝請卽晁子闔次適通直卽梁護次適  
從政卽仲壽朋次適迪功卽馬諒再適迪功卽傅伸孫  
男十四人詵承議卽謹承奉卽諤從事卽諫承務卽誼  
朝散卽謙承務卽訥從事卽訖今為朝奉大夫荆湖北

路轉運判官說通仕卽訢從事卽證將仕卽詠訥諤孫  
女十一人公天資高明積學深至早歷清要號稱文士  
猝遇國難大節凜然為廊廟之器嘗奉詔編類平江勤  
王及奏請本末付禮部鏤板公既列上卽匱藏元牘後  
自泉南繳納省中子孫始知一時定計具草手疏皆出  
公及朱丞相之手他執政著名押字而已罷政十七年  
避時相不復出讀書作文雖病不廢延納後進教誘無  
倦稱人之善覆護所短若親舊行己未至則質問再三  
使歸之正奉養簡薄振恤宗族治家嚴而恕每愛徐孺  
子申屠子陶淵明之為人晚棄世故深造以道夫子所



謂朝聞夕死者蓋得之所著草堂前後集一百卷行于世其葬也寶文閣待制趙思誠為之誌諸子遇恩累贈公太師配封魯國夫人淳熙初公薨三十餘年矣近臣及公叱苗劉事孝宗嘉嘆特令定謚其後有司以勤學好問曰文應事有功曰敏易公名今公諸孫惟季子之子說在典州持節學世其家以公神道未碑遠使來請某久備史官得公出處故詳書而系以銘曰

齊魯之間 儒學之淵 道閉賢隱 祥麟出焉

由漢迄唐 士多名世 公生盛朝 亦拔乎萃

其來儀： 資適逢時 以文華國 天子所知

變起弗圖 公奮烈： 面折群亮 我勇彼攝

籌帷既咨 義旗既麾 中外協力 乾清坤夷

倬彼宸章 粲若星日 告于萬邦 丕顯公蹟

上方用公 公曰歸欤 成功者天 寵則難居

燕處超然 道則深造 窮理盡性 庶其允蹈

生有自來 逝也名垂 刻詩道周 言何敢欺

平園續稿卷第二十九 終後一篇闕

周益公集 平園續稿卷第二十九 文瑞樓



平園續稿卷第三十

周益文忠公集七十

神道碑十

同知樞密院事贈太師洪文安公遵神道碑嘉

泰三年

洪忠宣公見危授命半世異域白首來歸力陳忠言至計高宗方引以自近權臣惡其害已不使決日安于朝廷之上至以漠北僅存之身投諸南荒必死之地身且不閱違恤其家然而長子丞相文惠公次子樞密文安公被遇兩朝先後得政又次子翰林公邁未及大用而入從出藩翱翔最久益立朝莫清于登瀛莫榮于代言



莫重于掌文柄莫尊于間兩社公既與昆友迭居並以  
文章稱天下公又先進或一再至焉其後孫曾印綬相  
望方興而未艾衣冠盛事世推洪氏易云積善之家必  
有餘慶傳謂非此其身在其子孫蓋天定能勝人也樞  
密諱遵字景嚴世為饒州鄱陽人曾祖炳贈少保妣紀  
國夫人何氏祖彥先贈太師榮國公妣秦國夫人董氏  
忠宣諱皓終徽猷閣直學士左朝散大夫贈太師冀國  
公妣楚國夫人 氏世次見文忠碑公兒時端默如成人  
楚國亡慟絕者再苦學忘晝夜詞章壯麗自成一家紹  
興十二年春以右承務郎監南京中嶽廟冠詞科賜進

士出身高宗念其父特除秘書省正字復科徑入館自  
公始閣下多前輩皆以畏友待公明年春文惠公繼來  
播紳榮之秦熈為秘郎為少監勢燄赫：公守道安恬  
留滯不遷九月忠宣去國公求通判常州守湯樞密鵬  
舉部使者孫祕丞汝翼待僚吏嚴峻公雖少而明擯吏  
姦臺府爭委以事務倅婺州守李琛傲悞亦知敬公升  
佐紹興府未上十五年夏再入為正字攝行外制十一  
月湯樞密執法殿中薦為御史方賜對而忠宣公薨服  
闋召還公奏先臣與龔璿均使虜廷璿臣劉豫以擅殺  
人被誅秦檜反贈節鉞臣父抗節乃貶死可謂不分逆



順矣詔還忠宣舊職賜謚擢公起居舍人遷郎兼權樞  
密都承旨二十八年也明年正月除中書舍人賜服金  
紫殿前裨將輔遼轉防運使王綱團練使公言近制管  
軍十年一遷二人尚未滿歲上喜曰步帥趙密去年求  
遷詞臣謂密為節度使方九年逮今乃除太尉卿論二  
人軍中自以為當也時勲臣子孫多歷臺省議者以為  
言詔序遷至次對即久任內祠公奏侍從非磨勘比  
序遷可乎三十年正月兼權禮部侍郎俄遷吏部選  
人詣曹改秩予奪遲速一出吏手公隨事疏理吏不得  
肆元顏亮將渝平中外以為憂沈介使回獨謂無它公

請密為邊備八月兼權吏部尚書舊制文武臣致仕任  
子許所在州保奏或請必由本貫革欺弊公言宦游蜀  
廣或數千里自有勅牒可驗詔仍舊法公既以近臣兼  
承密旨邊防民隱每為上言二衙春夏牧馬夏菰城仰  
給蘇湖秀三州適積水冒田有司預請倍輸夏麥以補  
芻粟北虜索絳陽郭小的安化劉孝泰等二百家公皆  
執不可軍器利弊命公料簡公區別良窳眾請熟于軍  
旅者未必能也上以是有大用意入翰林為學士典銓  
如故明年御史論湯丞相思退章不下內批以大學士  
奉祖公當直例作平詞諫官云：公連請去三省擬除



敷文閣直學士上令進徽猷提舉江州太平興國宮閣  
三月平江闕守上親用公先是虜亮命張忠彥堅壁鳳  
翔拒吳璘以劉蕡政擾襄漢自將精銳及簽軍分寇兩  
淮謂我悉兵扞邊乃別造舟膠西刷河北壯丁雜金人  
號大漢軍統以蘇尚書者將由海道乘虛擣二浙謀知  
其謀詔浙西總管李寶率舟師禦之公竭資糧器械濟  
寶：乘風盡焚虜舟亮謀既壞忿躁就薨寶由大  
夫超授靖海軍節度使公有助焉步帥李捧嘗請斷吳  
江橋防虜入或又欲整常熟縣之福山限其騎軍公曰  
審爾是棄吳以西耶凡堂帖監司符 皆收不行上幸

金陵從衛百項傍郡承迎不暇入公境獨無過求公謂  
官拘商船聚近海縣募水手留民兵夾運河築烽臺徒  
費無益悉條奏散遣吳人德之三十二年夏上將內禪  
趣召公日詢來期遂還翰苑凡傳位及登極赦上太上  
尊號追冊安穆皇后并封三王制詔皆公視草六月進  
學士承旨兼侍讀隆興元年知禮部貢舉皇城邏卒挾  
內侍王允修侵辱士人公引蘇軾奏陳愷故事以聞閩  
士揖其友邏者指為傳義欲掖出之公命卒業一士賦  
擅場又有對策剴切皆傍犯名諱公為取旨許降等奏  
名前二人林光朝接鑰也陳自修試詞科擬制一語聲



牙被黜公薦其才學特與教官其愛惜士類如此五月  
同知樞密院事張忠獻公以元樞督師江淮公與宰相  
協心幃幄凡處分機要平議對境書檄敷陳曲折率稱  
上意公前在從班與正言周操議論不同至是操為御  
史將以和戰不決彈公疏未入語漏上徙操權吏部侍  
郎公不自安求去上却其章請益力以端明殿學士再  
提舉興國宮還鄉傾貲葺園圃築小隱堂日與昆朋賦  
詩飲酒極溪山之樂乾道六年起知信州民遇吉凶及  
營造困于科酒諸縣重賦歛州市物虧其直公家隣郡  
素知之至即亟為罷行旬日驛召赴闕奏事時江東圩

田壞徙公知太平州前政即周御史聞公來不俟合符  
馳去公追餞十里曰前日國事何嫌今不為子孫契耶  
交權而行公躬履圩埂勸相徒役用工數萬人忘其勞  
轉運張松妄奏圩未嘗決民無轉徙止當責成圩戶裁  
省催募公乞朝臣按視于是將作監馬希言監察御史  
陳舉善繼來直公之言圩成合四百五十有五松方別  
治漂水永豐圩過料工費壑隣逞憾公曰郡當歲儉方  
振恤流移勸分乞糴如封股不克喉尚能飽他人之腹  
乎力訴于朝就除知建康府兼本道安撫司行宮留守  
上諭當制舍人范成大載公治績且許入覲時虞丞相



允文有意北征先移駐侍衛馬軍驟增萬灶勅公同二  
府議于內殿公奏呂惠卿請與弼臣同對神宗赫怒迨  
太上在金陵張浚司留鑰亦不許偕執政奏事願別班  
引上批所委體大共議勿辭蓋迨比所無也進資政殿  
學士寵其行至則蠲苗米耗剝許民自持斛槩徧走郊  
野位置營壘民居及塚墓一無相涉諸將不能易上賜  
手札曰寨地異同卿挺身任責非乃心王室疇克爾踰  
年役興禁卒醉酒搖衆公磔于市帖：無敢噪御前軍  
嘗晝入旗亭挺刃推壚公付獄驛聞統帥懼罪乞付軍  
自治上怒罷統帥公亦貶秩二等頃之 營乞工亟還

元官加大學士屬部饑公疲精採荒食少事多庸醫勸  
服礬石鼻衄不止暮夜江舡火近大軍倉公馳採疾益  
侵祠章三上淳熙元年春乃許提舉臨安府洞霄宮十  
一月甲午薨于里第享年五十有五積官大中大夫贈  
宣奉大夫爵本縣開國子食邑六百戶四年正月丙午  
葬湖陽七蟠山之原妻咸安郡夫人朱氏尚書右丞諤  
之孫朝議大夫正剛山翰林狀公遺事上太常謚曰文  
安有文集八十卷東陽志譜 各十卷錢譜五卷男子  
三人稱今為奉直大夫新知峽州据早世棹今為奉議  
郎新兩浙轉運司幹辦公事賜緋魚袋女六人四不及



嫁其二適禮部尚書木待問提轄左藏東西庫陳由義  
今俱亡孫男七人介舊名恢今為奉議郎淮東常平司  
幹辦公事悅承奉郎早止由通仕郎僖承奉郎佺伸侯  
未仕孫女八人長適儒林郎新四川總領所幹辦公事  
余忠卿次通直郎前知德化縣汪杲繼室以其妹次許  
進士楊景受二天餘未行曾孫男三人艾將仕郎蔚登仕  
郎著將仕郎以二子升朝累贈太師咸安後公十二年  
十二月薨與同公穴贈秦國夫人昔某試館職公實發  
策孝宗初元分掌內外制每議事輒聯名相與至厚以  
是峽州遠求墓道之碑惟公靜重通明平居言不輕發

上前議論纚：語簡而理足雖以文進政術自高與物

無競人不知其守其未嘗以公與親舊有求指其不辭故通貴而餘皆其既備書見閭復以銘曰

幼躬燾後 有聞于先 進德修業 惟嗣之賢

嗟：忠宣 奮身致主 生死朔南 兩極艱苦

天實恫之 三子英： 科名宦達 公則先鳴

翔于樞庭 底績三鎮 有猷有為 謂復得政

何德之減 而年弗長 惟文與行 沒世彌彰

彼崇者立 屹立斯石 詩以颺之 有永無斁

和州防禦使贈少師趙公伯驩神道碑嘉泰四年

太祖皇帝七世孫和州防禦使提舉佑神觀贈少師諱



伯驩字希遠系出燕懿王。生彰化節度使惟忠彰化  
生宣城侯從謹號宣州位宣城生崇國孝恭公世恬崇  
國生嘉國公令駿嘉國生左朝奉郎贈大中大夫子爰  
公大中第四子母碩人劉氏毅肅公昌祚孫紹興初以  
嘉國遺奏補承節郎監紹興府餘姚縣酒稅樞密韓公  
肖胄以一代人物薦于朝歷監臨安府市舶務潮州商  
稅臨安浙江稅高宗嗜米芾字芾嘗奉詔書崇國誌銘  
真蹟進御喜曰令駿及從蘇軾黃庭堅故子姪皆業儒  
朕在宮邸知之召對待以家人禮錫芾賜第屢侍清燕  
改侍衛司馬幹辦公事浙西安撫司幹官隆興二年擢

本路兵馬副都監兼職德壽宮進兵馬鈐轄乾道六年  
金國遣耶律子敬張僮來賀會慶節假泉州觀察使知  
閤門事充接送伴副使者聞公議論激昂甚加敬憚初  
孝宗銳欲恢復用宿將李顯忠邵宏淵大舉北伐雖二  
將不成王師自潰然威靈所加中原多響應者虜由是  
委曲求和上亦思蓄銳再舉姑從之當時虜求海泗我  
若求鞏洛如鄭壁假許田于理為長况彼以太上為兄  
書儀一用敵國歲幣復損十萬已計其大豈計受書細  
禮此自謀臣欲速無遠慮之失也是夏上命起居舍人  
范成大充泛使議二事虜許遷奉祖宗及欽宗梓宮至



于受書亦無峻拒意尋遣中書舍人趙雄賀金主生日  
選公為副南渡宗室北使自公始十一月己巳某夜直  
玉堂大璫霍汝弼出御札云生辰使兼賫國書一封理  
會受書卿可擬進立具草付弼明言尊卑分定或校等  
威叔姪情親豈嫌坐起上批付宰執商議二劄併得家  
藏後四日召見褒諭云卿能道朕心中事因宣示成大  
所携回書讀訖奏臣不知彼說陵寢豈可止及受書上  
謂難為辭奏云容臣與宰執謀別作意度退至都堂而  
商議之批已先下某添一聯云惟列聖久安之陵寢既  
難一旦而輒遷則靖康未返之衣冠詎敢先期而獨請

宰執難之七年正月雄等行壬辰宰執謂予對境果移  
文問二事悔不用君言予云幸雄未出境宜易國書而  
檄對境所問附賀生辰使副仍錄本付雄等毋如呂夷  
簡不使付弼知書意也諸大夫以為然奏遣密院使臣  
追及雄等于盱台虜自此始無說前公與雄陞辭上以  
賀書授雄別緘授公虜遣盧璣烏林答仲傑接伴知持  
禮特用宗室待遇加厚父老亦嘆曰此我家天族也老  
嫗有流涕奉壺漿者至保州驛公率官屬望國初先望  
御莊悽愴稽首人為動色公與璣輩在道誠意相孚璣  
問此行無他求否公及別緘璣必聞盱台之檄喜公無



隱亦頗通情嘗詰公南朝移司馬屯金陵似將遷都又  
濠州人夜劫靜安鎮馬殺死軍兵無乃求釁有諸乎先  
是盱台守龔蓋禁止騎淮作過人犯者必斬公携印榜  
示璣且謂渝盟不在移屯動觀聽璣等皆冰釋暨入見  
雄與公各進國書入辭亦各授答書公再三奏從違其  
宣徽使敬嗣暉傳命云已載書中勞還上悅自武翼郎  
超轉武翼大夫俄陞本路副總管公贊帥優支將士餐  
錢精教閱明階級捕逃止禁私役一曰內教上謂驍勇  
不減三衙褒諭帥守趙璠老璠老歸功于公特領榮州  
刺史淳熙五年公子司農寺主簿師異論對上曰卿父

宗英旦夕煩一出明日遣內侍問公浙西刑獄轉忠州  
團練使時議分屯四明水軍于平江之許浦委公相視  
公言沿浦泥沙膠舟利屯輕舸若戰艦當泊青龍鎮詔  
可郭大用代于友為統帥欲毀民居夷丘墓繕營壘公  
請市間田公私便之蘇湖闕守公皆兼攝晝夜服勤庭  
無留訟潔己裕民財用贍足江陰士人吳姓者罪當杖  
而情可恕公緩之运用赦原吳興元犯法公命教授筮  
以學規愛惜士類如此或得盜賊囊橐鋤治不少恕特  
轉武功大夫和州防禦使以勤瘁得足疾七年冬師異  
接伴金國賀正者上令過平江為朕屬卿父謹疾自愛



許送伴回程少留八年天慶觀火焚正殿公籍黃冠私  
帑一新之上賜筆金闕寥陽寶殿并親札賜萬緡助雅  
飾行在闕尹上欲用公固辭詔令奏事留奉內祠九年  
正月特落階官以正仕并提舉宮觀張燈宴客自歌所  
制樂府酒罷欲寢無疾而逝十一日也訃聞兩宮軫悼  
賜秘噐以斂年五十九是歲三月三日葬平江府吳縣  
至德鄉觀音山十一年師翼用大禮恩乞易公文階換  
通議大夫累贈至少師初娶楊氏廣西鹽幹華之女先  
二十四年卒再娶劉氏昭懷皇后弟儀王安成曾孫後  
公十七年卒皆自恭人累贈秦國齊國夫人並祔葬焉

二子師翼以文舉第進士才敏歷內外要劇嘗守臨安  
歷工戶二部侍郎今以龍圖閣待制帥維揚師弁武經  
郎新常州兵馬鈐轄五女長適訓武郎董珏迪功郎湖  
州烏程縣主簿李秀實再寡次適故通直郎知江陰縣  
陳岫又適武功大夫主管神祐觀張延裕次適文林郎  
新臨安府觀察推官胡如祖次適故承節郎寄班祗候  
續湜孫男三人希蒼承直郎建康府駐劄御前諸軍都  
統制司書寫機宜文字希虞保義郎監潭州南嶽廟希  
祐文林郎太平州蕪湖縣丞孫女二人長適從政郎監  
紹興府諸暨縣中浦橋犒賞酒庫楊訓次適宣教郎知紹



興府崧縣唐人民亡矣公風神警邁性識明敏束髮喪  
父毀瘠過哀既娶與秦國事母孝敬兄沒撫孤姪過已  
子割俸助嫂蓋自大中繼登儒科仕止佐州篤意教子  
孫至公博洽醞籍長于歌詩心畫取法晉唐助游戲于  
丹青食客常滿座羅列書畫弓刀自娛而無聲色之奉  
踈財重義欲種德遺後世家無餘貲高宗知其居陋隘  
輟地基于比隣仍給工役費以益之甫落成而師曩唱  
名在丙科又摘御前聞喜宴詩大書榮挂榜其樓後數  
日孝宗宣引獎其義方之訓兩朝宸章充滿篋笥士艷  
其榮自號無隱居士有詩詞二十卷藏之家予父與公

父子同朝至是揚帥按贈典子為侍從父極三少乃以  
族人故中書舍人彥中所次行實請碑墓隧為之銘曰

唐興聖典 姑減攸自 歷世惟七 揆實賢裔

人門第一 蕃酋知貴 洵美亞師 有華帝系

名聞幽燕 厥亦膚使 僅登扞防 丕載高位

顯允令子 一品追祿 勒銘昭之 前修是繼

武泰軍節度使贈太尉鄭公興裔 神道碑 嘉泰四年

顯肅皇后當徽廟太平極盛時正位中宮恭儉有容聞  
于天下族屬往之被服儒雅威儀之高宗南渡諸后  
家多阨于兵惟顯肅之侄榮國端靖公諱藻舉宗扈蹕



久領上閣以使相奉朝請考終于家公益其猶子也自  
以才敏結主知歷中外予長樞廷來承密旨聯事三年  
見其議論正職業脩又與予同生丙午以是其子持秘  
書丞龔頤正所狀行實求碑墓道誼不得辭鄭氏世家  
開封公初名興宗字光錫孝宗選介北使賜名興裔魯  
祖諱紳太師樂平郡王追王南陽謚僖靖妣秦國夫人  
李氏蜀國夫人任氏祖諱翼之陸海軍節度使贈太師  
魯國公謚榮恭妣宗女仁壽郡主父諱蕃武經大夫和  
州防禦使贈少師妣燕國夫人趙氏公早孤父事崇公  
紹興四年用顯肅遇明堂大禮恩補成忠郎監潭州南

嶽廟幹辦祗候庫昭慈聖顯皇后齋宮內外巡檢志在  
問學留林下六年未嘗干進監鎮江府推貨務都茶場  
歷秀州宣州平江府兵馬鈐轄隆興元年陞江東路鈐  
轄乾道初留司治行宮望幸公謂勞人費財且都統及  
馬軍行司擇帥未善孝宗由是簡注三年徙閩路入對  
詢守令減否公誦所聞上曰卿練達時務習知吏方行  
當用卿會復置武臣提刑七年就使本路郡守與寓公  
因詩文交訟獄久不決公平反之甌寧有殺人亡命者  
千繫日衆公乞摘斷上喜遙領高州刺史福帥常用大  
臣監司例不可否獄事公獨舉其職制檢驗三格日一



申本司一上所屬一付被害之家參互考實遂著為令  
四郡屢更益笑漕臣請易綱運為鈔法公極言其非又  
謂薦舉不公選人宜參用考任縣尉捕盜改秩多偽當  
加審覈海寇倏去忽來調兵常無及宜復置澳長寇至  
徑率民兵禦之又中禁兵事藝未精仍多私役漳州  
野象害稼民設機穽而獲州縣追取其齒無敢捕者悉  
條奏罷行之八年領成州團練使示旌褒也或傳虜有  
異志召為生辰副使覘之使還具言無他提點浙東刑  
獄淳熙元年易浙西鎮江軍習水戰貴近將命在焉大  
風舟壞士溺詔公審視公以實聞有不樂者徙公江東

請祠歸九月除知閣門事兼幹辦皇城司十一月兼樞  
密副都承旨接送賀正使者步軍營婦楊殺旁舍兒取  
臂釧而棄其尸廷尉論如律刑部以無證佐出之詔公  
與御史雜治得實上曰朕固知鄭某能辨此以其廉貧  
特支真俸賜第百官宅仍給營造費公自初仕積十四  
遷至武功大夫領和州防禦使四年特轉右武大夫四  
月丁母憂六年免喪職任如故尋副館伴又克明堂大  
禮行宮使八年落階官正除均州防禦使九年再使金  
國遷潭州觀察使榮國薨公請間致追報之義提舉佑  
神觀十三年起知揚州不拜明年帥廬歲儉力舉荒政



活饑民為多十五年復從維揚適承匱乏樽節百方初  
在淮西却隣道互送禮公至按籍有支無收前政俄坐  
妄費得罪軍糧不足例糴他境公槩括慘漏補其費編  
戶茅舍因火災貸民萬餘緡陶瓦一新之復請于朝免  
責其償楚州議改築舊城或云此韓世忠遺其基不可  
易上雅信公特命臨視闕地丈餘板幹堅密上閱奏喜  
曰鄭某不吾欺也久之以餘力葺學校立先賢祠定部  
轄民兵外差法作成士氣濬漕河治橋梁創義塚細大  
畢舉光宗嘉之紹熙初年特遷保靜軍承宣使二年召  
領內祠克明堂大禮都大主管大內公事今上即位四

明調守公在選中兼沿海制置使蠲常賦撤私稅闔境  
便之慶元五年告老制授武叅軍節度使中興後轉節  
度使致仕如前執政葉夢得自觀文殿學士而換劉貴  
妃父懋由兩使而遷止降外制至是特宣麻蓋異恩也  
爵自壽昌縣開國男食邑三百戶累封郡侯食邑一千  
九百戶實封二百戶方從容賜第築退庵以佚老九月  
三十日以疾薨于正寢壽七十四特贈太尉公天性孝  
謹燕國之喪幾至於毀榮公將終分以餘貲公辭曰叔  
父素恤宗族願立義莊贍南北眷至今賴之上前論事  
無隱孝宗嘗歎風俗苟且公曰陛下當治其本凡將相



大臣審擇而篤信之使安其職則苟且之習革矣上以  
為然職事所及間薦人才未嘗使知平生寡嗜德每從  
榮公講論朝儀退語諸子喜誦白樂天詩取言行可法  
者為聞見錄故其述也九重震悼宰執暨文武朝士皆  
賦哀挽舊治士民祭奠絡繹有司定謚曰惠肅娶林氏  
同知樞密院事吳郡文節公希之孫贈碩人前公十八  
年薨子男四人長挺 大夫忠州團練使新知揚州  
次為成忠即早亡次損從事即浙東茶鹽司幹辦公事  
次抗文林即浙西茶鹽司幹辦公事女六人長適承事  
即前添差兩路轉運司催促物料官高可大次適承直

郎前知池州建德縣劉植次適武節即太平州兵馬鈐  
轄張莘次適奉議即提轄權貨務都茶場王子瀉次為  
尼賜號直戒大師次天孫男二人鑄保義即早世次鐸  
承忠即閣門看班祇候孫女一人諸孤以是年十二月  
庚午葬公臨安府餘杭縣石門山從少師之塋其銘曰  
列聖家法 高出前世 姻戚多賢 相率勉勵  
英、掌武 其美能濟 進不以思 從政果藝  
張檀朔漠 覘國無蔽 攬轡閩浙 祥刑有惠  
導音籌幄 司儀班綴 淮壖撫綏 勤海節制  
顯庸交奏 宸指默契 引年告歸 旌節里第



胡不百年 遽逐川逝 咨爾後人 引之勿替

平園續稿卷第三十 終 後一篇闕

平園續稿卷第三十一

周益文忠公集七十一

墓誌銘一

胡斗南 奠墓誌銘 紹興五年

紹興十三年高宗皇帝復置國學於行在所四方英俊  
挾藝求試以萬計江西素號士鄉越明年中選者通一  
路終三人而友人胡斗南在焉自是或留肄業或歸省  
親往來四十年聲譽日聞凡閩浙江湖先進若後生一  
游成均則知斗南姓名由是修身安分通經而瞻於文  
者爭願結交人謂釋褐可日月異而連枉有司中間僅  
一遇覃恩免舉一以詞賦獲舉迨升舍就試蜀人李賢



良宦考其文第一御史揭榜復疑人數不應式罷去祭酒司業博士正錄無不嗟惜之後值德壽慶八十恩乃授迪功郎監潭州南嶽廟淳熙內禪循修職郎又數年而沒其初終如此今天學者不知進德修業每考得失於占筮一或連蹇非怨天則尤人惟吾斗南學成名立自鄉達于國皆曰當然乃獨不然嗚呼可以言命矣君諱箕字斗南其先自秣陵徙廬陵曾祖將仕郎諒祖鄉貢進士方中考宗古廬溪王先生庭珪嘗銘其墓君幼而志趣不群既長貫穿經史尤精於春秋為文下筆數千言衮衮不休間得異書口誦手抄忘寢興已老無倦

事親篤孝免父喪擯哀冠於墓次過忌日及歲時上塚必哭而服之母太安人陳氏無恙時聞歲自學謁告徒步數千里不憚勞諸弟藉君教導皆有聞其季藉登第改秩不幸早世君平生介潔廉方一飯不輕就一毫弗妄取服用簡質居無惰容與人交謙恭誠信未嘗戲侮鄉隣有不善惟恐其知胡氏大族叔父資政殿學士忠簡公帥以嚴正群從畏憚惟待君加禮君亦有聞必告忠簡公每於廣坐褒稱之風勵其餘生七十有三年以紹熙五年二月六日卒娶曾氏安遠令嵩之女四子楷模格標伯仲嘗同試春官楷仍再舉文尤高二女長適



鄉貢進士倪升卿一未行孫男四人黥熒萇煖女四人  
遺稿三十卷三傳會例三十卷孫吳子注解並藏于家  
諸子卜是年十一月丙申葬吉水縣中鵠鄉溪塘蕉坑  
之原以狀求銘予與君游久知君為深銘無愧辭銘曰  
行著一鄉而能不施於邦文傳四方而利止賓于王  
惟德之彰惟子孫之昌嗟吾斗南庶幾不亡

宣義郎致仕賜紫金魚袋胡公 昌齡 墓誌銘 慶

元：年

江西多名士吉為冠自吉言之廬陵胡氏為大族群從  
百數多通經工文章守禮典靖州治中汾宣和己亥上

舍釋褐循州錄事叅軍散中甲辰進士第高廟龍飛策  
士於淮海忠簡公以直言擢殊科益宏厥家其後大理  
寺主簿鎬知蒲圻縣籍相繼登第秋舉殆無虛榜它姓  
莫敢爭衡公於忠簡雖從姪而年相適同事蕭先生楚  
學春秋俱號高弟自公之祖已貢于鄉公當弱冠侍其  
父赴大比試父升而公黜公喜曰吾固不欲父子同薦  
妨他人自是才名章：人謂一第可唾手取迨年四十  
始上春官又二十五年當乾道己丑乃以特奏名對策  
萬餘言唱名入高等初補將仕郎類試中選授迪功郎  
靜江府司戶叅軍帥守張敬夫儒宗吏師不輕許可咨



公以府事潔廉正平闔府稱美滿一歲謝去敬夫曰君精力尚壯何去之果公曰某昔銳意亢宗今蹉跎至此姑欲應京秩格為門戶計耳敬夫不能奪賦詩餞之改承務郎致仕時淳熙四年也疊值德壽宮慶壽恩十年賜緋衣銀魚十三年轉承事郎賜服金紫壽皇內禪轉宣義郎蓋家居優游者十有六年紹熙三年十月二十七日以疾卒享年八十八明年九月壬午葬縣之儒行鄉仙壇嶺母塋之側治命也公諱昌齡字長彥曾大父諒將仕郎娶臧氏大父方中娶歐陽氏父仔母羅氏生公九年而沒遺言勉公學公泣而志之終身篤事繼母

劉氏解氏俱盡孝解先適黃氏有女嫁公從弟子棟而寡公收恤教育使有成立紹興己卯慈寧慶典解封孺人創佚老堂忠簡公為之記家故貧銖積寸累不憚苦節獨於賓祭致厚族姻不能自存者周急無少靳自幼至老學日益富每著書援證古今是非不休喜藏異書手自讐校有文集五十卷娶朱氏先一年卒四子長椿季根早世曰抵曰枸四女存者亦兩人張沆劉之瀟其壻也孫男曰艾曠女許歸歐陽塋余與公游久矣姪繹實娶公仲女不幸偕亡而公念舊弗替年過八十猶歲以詩遺余大篇小楷少年者自謂不及公今已



矣抵來請銘其可辭銘曰

孝於親及宗姻儉于身豐祭賓少而篤學老益勤仕  
烏遽止晚乃榮初終誰毀譽則聞謂銘不信詎鄉評

宋故連州彭史君

堯輔墓誌銘

慶元二年三月

慶元二年冬連州史君彭道夫以病卧家士大夫問訊  
者轂擊袂屬惟恐其不亟瘳也十二月二十八日竟不  
起疾於是吊客數倍於前識與不識皆咨嗟太息以謂  
道夫謹飭而和明敏而恕宜光顯於世乃止二千石宜  
至于耄耄乃五十九而止是何命不副才仁不畀壽也  
葬有日道夫之弟堯弼泣而請曰始叔公南安公未有

子嘗子堯弼叔父有子乃婦賴吾兄教育成立且盡推祖  
產與我今無以報矣願聲之銘詩以著厥美予聞書曰  
惟孝友于兄弟施於有政士大夫所以愛重道夫抑有  
由也則叙而銘之彭氏世家吉州之廬陵道夫諱堯輔  
曾祖皇任朝奉郎贈左正議大夫諱衍妣碩人蕭氏祖  
皇任右朝請大夫尚書戶部郎中總領湖廣江西京西  
財賦贈金紫光祿大夫諱合妣文安郡夫人劉氏通議  
夫人李氏太寧郡夫人曾氏靳春郡夫人黃氏父皇任  
右迪功郎南雄州保昌縣主簿贈奉直大夫諱楚老妣  
恭人劉氏道夫以戶部致仕恩補將仕郎隆興二年試



文冠南銓擬右迪功郎柳州馬平尉簿桂帥中書張舍  
人孝祥數委以事每稱其能去為靜江府司理叅軍用  
舉員陞從政郎淳熙元年移贛州錄事叅軍獄囚危有  
志罪不當死隣郡貢士黎實為仇家誣以當死提點刑  
獄皆欲殺之至盛怒臨道夫道夫堅持不可卒直其枉  
官軍捕茶寇間俘平民道夫悉平反之它不以權執移  
不為囑託私者尚十餘事薦章交上四年改宣教郎七  
年知贛之石城縣踰歲為部使者以私意劾免時留丞  
相作州誦言非辜使者尋悔悟謝它日言官亦以是擿  
其過道夫遂起知江陵府枝江縣：在水中央歲罹巨

浸乃用工二十四萬大為隄防水不能蓄又以招糴易  
和糴四境帖：則葺縣庠教養生員仍即三鄉各立小  
學士民歌舞之十五年賜緋衣銀魚紹熙元年通判興  
國軍舊科黃河埽岸衣絹其後均之正稅足錢六千五  
百道夫力言於本路轉運林湜為裁其數足準五千而  
以漕計代輸其餘人兩賢之綱馬道出屬邑之永興數  
芻糧擾甚道夫請括逃田充其費大冶縣三山產鐵為  
私鑄窟穴姦盜雲集道夫請調江州軍二百人駐漳源  
樊口遂解散四年造朝留丞相適當國進擬道夫知連  
州陞辭論天下平治日少願毋玩目前之安因及枝江



義勇差役興國私鑄上皆嘉納積官至朝散大夫妻宜人黃氏先十年卒三男岳迪功郎新監潭州衡山縣戶部贍軍酒庫岳當以蔭補官尚幼三女長適從事郎袁州司理叅軍康奭之次適修職郎新柳州桂陽縣主簿董九成季未行孫徽女一其葬用二年三月丁酉地在本縣高澤鄉義秀山之原初道夫之生戶部赴召道夢神人以得孫告戶部異之五歲能讀書十五喪父哀毀如成人事大父諸叔孝敬盡禮踰冠入仕已能持心近厚及臨事則毅然有守未嘗苟且故所至多可紀藏書數千卷集前言往行以為軌範善與人交尤尚義周

急故居鄉無間言銘曰

五常之教

兄友在中

或闕于牆

惟貸之從

怡道夫

幼孤匪富

仲也來歸

先疇畢授

才能孔多

念茲則那

鄉評喟然

以勸其他

京西轉運判官方君

崧卿墓誌銘

慶元二年

故人林斡子方才高而守正吏事號強明其守信州稱上饒宰方君季申不容口時淳熙丙申歲也子方嚴於取人予常記之後十五年奉祠歸廬陵季申適來守見其決事如流往：飾以儒雅庭無留訟刑罰日清凡未運力勝皆罷其筭歲省八邑月解錢數萬緡大蠲積逋



以寬民力而用自足郡庠故存歐陽文忠公祠它無所  
問君即後圃創六一堂繪像以事其先壟在屬邑瀧岡  
下令尉捐俸葺之又袁公翰墨及集古跋真蹟刻示四  
方皆前人未嘗及者君去後開三守人：為予言凡疑  
獄滯訟經方君剖決者一字不可易其政如此予每誦  
言子方知人今豫章牧右文殿修撰蔡公戡狀君遺事  
且道其子之意屬予以銘其何可辭君諱崧卿季申字  
也九世祖自光州固始縣徙家興化軍族系日繁曾祖  
早祖淵皆不仕父憲文林郎南息州陽江縣令後贈朝  
議大夫陽江卒七月而君生稍長能自力于學登隆興

癸未進士第試教官中之以左迪功郎為紹興府：學  
教授未赴丁所生母張宜人憂乾道丙戌起家湖廣總  
領所幹辦公事秩滿陞從事郎賞循文林郎添差淮西  
安撫司準備差遣會省員徙兩浙路轉運司屬官積營  
造功循直郎用薦者改奉議郎知上饒縣初葉丞相顯  
著治縣法一編世服其能君其婿也能遵行之縣凡七  
十二都保正副百四十人君令旬分四番：三十五人  
迭詣縣受約束皆給曆有故或追呼批曆授之無則  
奉曆而退人既不勞事亦隨舉保長則揭示當輸之戶  
及其數五日一集出納明白上下簡便先是督鄉司具



民之物力高下毋敢不實封文書案問遇當役者爭承則啟封參考親加詰問情偽立得人欣然就役常平使者潘時以名聞召赴都堂審察通判明州壬寅秋旱守委三倅分行六邑荒政君主奉化象山獨無飢民定海縣鳳浦沈窖二湖久為浮屠氏擅其利民失灌溉君適被朝命一切正之乙巳春選知無為軍未上改南安軍肇新貢院條教簡嚴郡人祠君子學積官朝請即會壽康皇帝登極轉朝奉大夫諸司奏減最入對論監司當隨所見按吏今乃牽引它司交章以為驗不幸出於私寃何自伸願禁其然上嘉納焉紹熙元年春除知吉州

以大治用招軍賞特遷一官二年擢廣東路提點刑獄三年從廣西轉運判官君大講益筭會計更法之諸郡實貨若干漕司歲得若干畫十二條上之且曰本路民困矣乃推剝以餉武昌又助靖州是謂瘠己以肥人請裁其數躬冒炎瘴徧行象橫欽廉鬱林貴柳等州諏詢其利病將復告于朝會得渴病求奉祠朝廷閱其勞以京西風土高爽易漕優之四年秋道長沙予適在焉留語累日君以渴為憂明年三月二十五日竟不起享年六十積官朝請大夫歸葬本軍瀨溪祖居之東原蓋慶元三年正月壬午也妻葉氏封宜人二子直孺信孺



皆將仕郎君風神警邁議論過人才具恢宏善治盤錯  
他人叔：已常休：至於薄物細故皆經理有法度博  
觀載籍因流所源不極其本弗措也築最書堂聚書四  
萬卷手自讐校尤喜韓昌黎文為舉止十卷附錄五卷  
晚別成箋校十卷與篇隱帙搜求殆徧時：發明韓公  
為文之本意非但志其所出而已在南安續橫浦集至  
京西補襄陽志正譌謬甚多詩文辨麗略無陳言二子  
類為家集二十卷嗟乎以君之才使仕于朝掌邦計條  
史牒無不可者而用流郡國粗試所長迄無以大顯於  
世是可惜已為之銘曰

游夏淵源 由求果藝 古難兼之 况乃後世

彬：季申 少自刻勵 兩邦三路 有政有惠

宜登史闡 宜贊邦計 未殫所長 胡疾而逝

吉民去思 永矢弗替 寫諸銘章 以表幽窆

宗室澹然居士 公衡 墓誌銘 慶元二年

唐虞成周同以睦族治天下而禮樂之教為急卿士多  
世胄國家賴之由漢迄唐雖存屬籍遠則無紀錄亦弗  
及信厚微矣本朝聚宗族于京師優給奉稍冠昏喪祭  
皆為之節人：自重不見過失分派聯名萬業可考如  
是百餘年至于裕陵世繫蕃衍始擇才者出而用之未



仕不問戚疏計口給廩內則治以宗官外則掌以尊屬  
今又百餘年賢才日衆任官徧天下視尚書周禮所載  
或過之無不及者尚何有於漢唐惟魏悼王曾孫安化  
軍節度使高密侯克整其配曰普寧郡夫人王氏側室  
曰馮氏後封真寧郡太君是生金紫光祿大夫叔暄娶  
建安郡夫人張氏生成忠郎監潭州南嶽緒之有子曰  
公衡字平仲母孺人張氏所生母金氏靖康之亂舉族  
南渡日益貧窶南嶽府君抱疾九江君年十五徒步迎  
醫數百里外府君竟不起既葬無以自給乃奉張夫人  
依諸父于豫章進賢縣食孤遺俸母子相與為命者數

十年夫人七十九而終君居喪盡禮內行彌飭邑官皆  
來致敬君杜門不妄交惟聞人急難不以早暮赴之里  
有疾疫倡率豪右躬為療治篤厚誠信見謂可托生死  
少喜黃老不事科舉泛觀經史百氏手不釋卷壽康皇  
帝登極補承信郎今上覃恩轉承節郎命下歎曰君恩  
不敢辭毋以干祿可也自號澹然居士作山居詩見志  
慶元二年夏疾作推五行曰吾死矣戒家事甚悉四月  
丁卯誦有生必有死早終非命促之句端坐而逝享年  
五十有九娶周氏鄉先生丕遠女山房李氏之甥年三  
十九前君二十年卒四男彥演從政郎常德府司法叅



軍彥璋文林郎福建路轉運使主管帳司彥法脩職郎  
吉州司戶叅軍彥沃未命一女適傅傳孫四人樵夫稅  
夫括夫權夫孫女二皆幼諸子以是歲七月丁酉葬君  
縣南十五里歸仁鄉麻山之原夫人祔焉使來乞銘予  
聞君夫婦奮躬躋勤一意教子其所從師慕君賢行樂  
為訓導不問末修有無而彥演彥璋彥法亦通敏好學  
師逸功倍遂同登淳熙丁未進士第子官湖南彥演彥  
璋皆嘗為僚迨歸廬陵彥法奉君官舍以是熟知其賢  
乃為推國家教養之法公族之盛然後銘君之美焉銘  
曰

其襟彬：其韞振：事親愛而欽接物和而仁維德  
之成維仕之屯維年之不羸維子孫之興


眉州太守張公

璘


墓誌銘

卷止兩篇餘闕

















Blank columns for text on the right page.



Blank columns for text on the left page.



平園續稿卷第三十二

周益文忠公集七十二

墓誌銘二

廣南提舉市舶江公文叔墓誌銘 慶元二年

紹興甲寅五月戊辰前提舉廣南路市舶江君文叔卒於家次年正月壬寅歸窆其子實等以尚書郎黃君所狀行實來請銘昔君侍父尉贛之寧都與予兄弟傾蓋如故自是熟君文行閱四十年情誼日親而君介弟立叔再壻予家銘君宜也君初諱澄字清卿後改今名上世洛陽人十一代祖承清為福州福清令因家侯官縣曾祖閔祖先俱不仕父詢真與叔父達同貢京師達登



宣和六年進士第詢真特奏名入官終修職郎南安軍南康縣丞累贈奉直大夫母恭人葉氏紹興甲子兼科取士君年十七以春秋舉于鄉其後連薦丁丑春遂中甲科補左迪功以父丞南康調南雄州學教授丁丙外艱徒步護柩二千里人稱其孝服闋為靜江府教授大新學舍增市田五百畝生徒雲集帥張孝祥雅重君去鎮日餞客滿座酒闌索贈言相規君曰舍人文章政事獨步一世加以持重則大用矣僚友愕然張不懌而起明日召君握手曰始聞君言實不能堪久之方悟平生失處正坐是耳因共載累日留詩為別用舉主陞左

從事即移鬱林州教授鄰境兵將忿爭走訴外臺提兵假道縱部曲掠奪州人奔避君諭以禍福迄不敢肆郡有冤獄理掾不肯言君白其冤部刺史二千石京削交上改宣教即復充沅州學教授秩滿通判建寧府監淳熙十年解試剗革宿弊迄今以為法屬邑運益取贏佐州用舊政各本錢不予郡邑交病君多為之于是兩濟太守鄭尚書丙政尚嚴君贊以寬纔八閱月避親易通判泉州兼南外宗正丞賜緋衣銀魚前守移疾政多底滯君攝事決遣如流闔郡翕然大商王元懋因抽解例輸白金君峻却之今資政殿大學士黃公治于鄉人



不輕許可時為叅知政事數誦言君之賢十三年擢使  
南海越明年視事舊例船舟溺風濤者抑子孫續其業  
人以為苦郡君首列于朝詔刊其籍船貨亦通課以最聞  
在官三歲未嘗私市一物被疾求主管建寧府武夷山  
冲佑觀積官朝奉大夫享年六十有七其塋在本縣白  
沙之前坡原妻宜人黃氏同郡保義郎鏞之女二子公  
實迪功郎南安軍司戶叅軍公宜將仕郎皆嘗試禮部  
愿恪有父風三女長適進士陳公球次適承直郎監建  
寧府合同茶場陳域季未行孫男四人昌孫于孫廣孫  
繼孫女三人君清明温粹濟以諒直少從鄉先生問學

傑然出于衆既仕益自刻勵聲譽昭晰平居未嘗失色  
於人臨事則志不可奪每誦馬少游鄉里目為善人之  
言終身行之故其蒞官居家各無玷闕友愛立叔琢磨  
甚至亦登甲科前君四年卒銘曰

瑟彼璠璣 琢為圭璋 不薦清廟 而使炎方  
斂其光輝 黃壤悠伏 更千百年 尚潤山木

譚宣義 字先墓誌銘 慶元二年

廬陵郡統縣八永新為大西界湖湘壤沃地偏民生自  
足間遇水旱疾疫凡邑之大家分任振恤之事某家發  
廩某家給薪芻某家藥病者某家瘞死者以是流殍稀



鮮縣官推勸分賞必首及之君子喜其近古惟譚氏儒  
術起家好善樂施至宣義君復合前四美終自行之故  
人以為難去年春得疾卒其家丐行狀于煥章閣待制  
誠齋揚公而謁予以銘昔我先太師秦國公暨我伯父  
金紫光祿大夫與君伯父朝奉郎贈中大夫諱觀光同  
登政和八年進士第世契之故義不得辭然誠齋之文  
美矣盡矣不可以有加矣姑第其家世始末如左君諱  
字先字信仲世居永新曾祖諱華不仕妣太孺人段氏  
祖諱傑累舉入官終承事郎賜緋魚袋贈朝奉郎妣安  
人龍氏尹氏其長子中大夫也次子諱觀復寔君之父

妣尹氏君孝以事親仁于恤下勤于學而勇于義尤切  
切教子曰煥曰潤繼賓于王淳熙癸卯年該長樂慶壽  
恩封承務郎自是十年間歷值三朝大慶四遷為宣義  
郎賜服朱銀築榮壽堂日與親賓燕樂侈上之賜士大  
夫爭詠歌之其卒實慶元改元三月壬子也享年八十  
八娶林氏成忠郎高之女封安人賜冠帔五子煥今為  
從事郎襄陽府司法參軍潤潭溥源並力學四女王揚  
烈張潞顏世忠張湘塔也孫男三人康叔同叔正叔女  
四人同叔名在南宮不幸早世煥等卜以二年十一月  
丙申葬君縣之思賢鄉蘆峯之原銘曰



起家固難 保之尤難 積善有慶 其居也安  
不虧于功 不替于義 以昭令名 亦詔來裔

彭元亨墓誌銘 慶元二年

慶元改元正月辛亥安福彭君以疾不起卜明年十二月庚申葬縣南十里某鄉某原前兩月其子經哀經踵門出左司員外郎李君兼書一通及太學博士湯君璠所狀行實以銘為請左司之言曰淳熙乙巳某尉安福聞彭君樂易信于鄉里會歲大侵郡督勸分君產中下首發廩為倡乃克有濟某以是嘉其人授以著作呂君祖謙辨志一編益自洒掃應對推以應物細行之於達

於全德凡前言往行次第畢載彭君受而服膺焉傳之副墨又求名儒達官敷繹之蚤夜力行不敢怠向善如力耕避惡如遠臭嗇於自奉豐于周急年六十三以沒其身動無過舉願有以表其窳予惟左司介而誠博士賢而文皆可取信宜為之銘君諱元亨字文昌其先自九江徙居吉州之安福縣曾祖朝祖承裕父知微勤儉好施邑人以長者稱之君世其業性尤孝謹父病篤禱于神乞捐已壽以益親父尋愈事孀姑如事母家庭熙然待制楊公萬里榜其書樓曰春風興以新詩工部謝尚書諤亦賦為平生著述盈篋今彙次藏于家娶同郡



歐陽氏前三年沒子男四人經顯綱繼女三人鄉貢進士歐陽成務劉淙歐陽好仁其壻也孫男七人龜年者年康年保年益年彌年壽年孫女七人嗟乎秉彝好德誰無是心惟能欣慕師之有淵原推廣其所未至斯足為一鄉之善士矣君之可銘不在茲乎銘曰

噫彭君 信所聞 善可為 老則勤 生無玷  
沒有名 永其傳 在斯文

朝請郎曾君

光祖墓誌銘 慶元三年

君姓曾氏諱光祖字景山一字承先五世祖宗自南豐徙居吉州安福縣曾祖弼祖序昌皆積善父嘉謨博洽

強記仕至從事郎衡州常寧尉累贈朝請郎君其長子也穎悟力學四舉禮部淳熙乙未歲登第以迪功郎主潭州善化簿未上丁父憂再主道州江華簿見謂通敏攝永明令用舉者陞從政郎移徽州錄事叅軍決讞精明寬伸誣伏郡守薦于朝監司亦薦之由承直郎改奉議郎堂選知臨江軍新喻縣：當孔道前令往：罪去君政事日修新庠序以勸士築陂塘以卹農民訟至庭曉以義理凡無賴屠沽鬻毆則以法繩之百里大治紹熙末採時事為十箴名之曰徇路別為序篇數百言詞甚剴切獻之執政期有補于國家要路多知己欲拔之



朝君志在便親調通判袁州垂赴而卒慶元三年正月  
六日也享年六十有四積官朝請郎賜緋魚袋先娶同  
邑王公衡之女贈安人再娶從事郎韶州樂昌令胡日  
新女封安人一男鄉貢進士傑二女長適進士王閱早  
世次適迪功郎新隆興府新建縣尉趙師德孫男三人  
士遜士遵士逾女六人長適劉鑑餘未行曾孫宜壽卜  
以十一月辛酉葬縣南永嘉鄉九岡之原君孝于事親  
仁于念舊揚人之善掩其過失為使所至有能名平居  
喜著述有禮記精義十五卷治功必致錄十五卷江湖  
詩集十五卷南溪舊稿二十卷長孫遜以君與予厚踵

門求銘于是君母大恭人李氏年八十五矣自君升朝  
繼逢慶典冠帔絲綸寵章交煥歲時二子率諸婦奉觴  
上壽孫曾滿前坐閱五世而君之子傑名在貢籍儒風  
濟：今相國京公大書壽衍二字以揭所居之堂名士  
咸為賦詩鄉人榮之慕之居無何傑死君戚：乘以微  
恙 自力娛嬉親傍比其將沒母子相持泣下鄉人復  
聞而悲之夫憂喜聚門物理果然幸君世祿延于士遜  
它日昆弟能自植立不隕先業振其家聲以慰曾祖祖  
母之心以成父祖之志是又鄉人之望也欽銘曰

嗟乎景山 名宦方興 匪朝之儀 惟親是寧



卷期在堂 五世其盛 胡齋君壽 以悲易慶  
有崇彼岡 宅兆中存 既固且安 利其孫曾

叅議董君

昌裔

墓誌銘

慶元五年

君姓董氏諱昌裔字夢旣廬陵郡著姓儒風郁然登科者相繼仁宗景祐元年放進士五百人郡之中選者十有一而董氏曰洙與其子師德弟汀姪師道儀一門五人在焉洙父子咸同丙科太守江鈞奏所居為五桂鄉邦人榮之儀仕至都堂郎中嘗歷部使者贈左正議大夫即君曾祖也祖乾粹又登嘉祐八年進士第仕至左朝奉大夫贈中奉大夫父彭右朝散郎知鬱林州贈通

議大夫君自少力學試郡庠率占上游宣和四年父告老補將仕郎靖康間丁外艱服闋以迪功郎尉台之臨海母憂免再調郴州司戶叅軍攝永興令蠻獠犯省地君發丁壯授方略扞禦境上民以奠枕移連州錄事叅軍二千石苛急恚君守法屢窘以事君不為屈或誣良民為盜君平反之俄獲真盜新守王大寶及外臺交薦改宣教郎為臨安府錢塘丞適闕命君行其事赤縣繁劇不勞而辦顯謨閣直學士劉公才劾薦君宜在臺閣添差通判婺州會省員罷入攝行都酒官連被最賞出為湖南轉運使主簿文字李全作亂王師四集糧餉不



之幕畫為多故叅知政事魏公良臣帥長沙以名聞隆  
興元年擢知興國軍宗室犯法君繩治不少恕譴辭詆  
誣有詔禁錮善良安烏地介江湖田疇下：非潦即旱  
君祈禱立應大修學校增給生徒時號循吏以年高丐  
閒得浙東安撫司叅議官秩滿求便鄉改江西以歸積  
官朝奉大夫賜服金紫妻宜人林氏吏部侍郎保之女  
治家有法內外肅然年六十八淳熙丁酉十二月乙酉  
卒後三年歲在庚子正月甲戌君亦卒于家享年七十  
八合葬州西萬松江一子文林郎新監行在車輅院冲  
元五女長適迪功郎宜州宜山縣尉高筠次適朝議大

夫江淮荆浙閩廣等路都大提點坑冶鑄錢林祖洽次  
適從政郎全州司法叅軍方珪次適朝奉郎通判潭州  
郭贊次適朝散郎通判衡州斛僖孫男將仕郎塾女一  
人自君之沒其仲女適林氏者日奉君姑從夫宦游深  
念父母之墓有闕又惟泉水之義重于歸寧教諭其弟  
謀改卜不事薰澤不御酒肉飯蔬飲水越二十年姑止  
終制適提點君按行所部遂得偕來畢精竭力遷奉雙  
柩葬撫州樂安縣雲蓋鄉西務之原寶慶元五年九月  
壬寅也雲蓋初屬吉水縣至和元年析隸永豐紹興二  
十一年復割五鄉置樂安而雲蓋在中至是始附董氏



先壟以成親志義貫幽顯聞者歎息或至泣下昔唐傳  
列女首以孝為言而所記節義率繫其夫若孝于親者  
僅得二李氏其一父殯于堂十一年朝夕哀臨不嫁以  
養母死身庀葬具其一叔徙他州聞父亡間道奔喪  
至則已葬力請開墓舌去棺塵其母病篤終日不視匕  
箸朝加旌表史亦稱美由今觀之既曰內夫家外父母  
家矣而苦節不匱兩致其義則視昔為尤難亦賢矣哉  
夫惟有女如此父母之賢抑可知已况君中坦外莊訥  
於言而敏于行居家有譽無疵蒞官奉公履正鄉人戶  
知之予亦深知之冲元及提點君以銘見屬乃為銘曰

君稱善人	仕則循吏	學緒先業	祿延後嗣
生也能然	庶幾無愧	有女而孝	言歸故鄉
宅兆既安	子孫其昌	沒也雖久	庶幾不止

高州趙史君介墓誌銘 慶元五年

慶元四年六月乙酉高涼趙史君卒官其子寔護柩數  
千里還吉州之舊居卜以五年十一月丁酉葬廬陵縣  
儒行鄉三合平之原泣叙治命謁銘於予：不忍辭君  
諱介字節夫鳳翔府寶鷄縣西平原人曾祖義作坊使  
贈左千牛衛大將軍祖華武畧大夫贈成州團練使父  
持武經大夫知橫州贈武功大夫君偉岸磊落通經史



有智畧初為武學外舍生其父坐法免官君忘寒暑甘  
典憲伏闕叫閣投牒臺省移書要路力訴冤狀如是累  
年卒洗丹書終二千石士論多之紹興三十二年用父  
蔭補承信郎程試絕倫調鼎州桃源縣巡檢終更尉贛  
之寧都未上召試閣門舍人淳熙二年也初孝宗置此  
官視文臣館職對策舍人院而後除日朝殿階察臣僚  
不如儀者大宴則與閣門使已下更互立御前最為清  
切滿四考即與郡而君在選中虜使來賀正旦假廉車  
充館伴副使六年以例出知道州改柳州頃之去郡孝  
宗詔以舊物起君後省格不下奉祠十五年歷主管毫

州明道宮台州崇道觀日與賓客賦詩飲酒奕碁博古  
通今議論纒：凡釋老諸書下至稗官小說無不成誦  
聽者忘倦郡守每以上客禮之甲辰夏守與戎鈐不成  
軍政頗墮一日其徒乘醉贅聚相毆已而曹逃驚擾市  
人君與予兄子中杖策造營開諭禍福皆帖：聽命諸  
司以聞將議賞或沮之而止起知高州至則次子亡從  
者亦病瘁君哭泣憂傷視事兩月而沒享年七十有四  
積官武經郎先娶潘氏朝奉郎通判道州森之女再娶  
朱氏朝請郎知新州琚之女俱封安人三男長即寔也  
今為忠翊郎嘗任袁州萍鄉縣稅官次宋乃前死者曰



容亦死二女適高子訖皆將仕即孫珙珣珙當以君致  
仕恩入官與女尚幼君早自植立既直父冤即經理家  
事不以累親心擇命士嫁二妹又恤其後諸姪婚宦俱  
賴之有詩文十卷藏于家銘曰

赤也可與客言

由也使治千乘

羌小試其才能

嘗交違于力命

朝方還而蹟收

符再剖而身病

尚修名之永垂

寧宿草之俱盡

通判彭君

高老

墓誌銘

慶元五年

故尚書郎彭公以厚德通才歷郡守部使者總領湖廣

江西京西財賦凡其所至專以愛人利物為心號稱名

臣諸子習熟義方聲聞交著仲諱商老字仲伊生于丁

未卒于己未葬有日其季轉運君漢老以朝散郎新通

判永州張煥卿狀來請銘噫予既冠獲升總領之堂仲

伊少予一歲相善也越五十年情誼加厚究其死矣尚

思銘之按彭氏世為吉州廬陵人曾祖諱士忠贈朝請

郎妣安人蕭氏祖諱衍進士起家終朝奉郎開封府錄

贈正議大夫妣碩人蕭氏總領諱合仕雖寢顯而官止

朝大夫夫人謂不極於用累贈特進妣永寧郡夫人劉氏

同安郡夫人李氏新定郡夫人曾氏武陵郡夫人黃氏



君新定出也莊敬自重質直好義力學喜為文熟毛氏詩漢書文選紹興己巳郊 蔭將任郎重去親側兩以迪功郎監潭州南嶽廟外艱既除乾道丙戌始為撫州崇仁縣主簿異時文書匿吏家恣為姦利君拘之聽事勾稽惟謹賦稅始正去為南雄州司理叅軍有江澈者掠賈歐陽若弼五歲子及其所生事發不承折米庫巡防卒以他事適典吏乘勢盜用錢數百緡逮治無辜李唐卿失白金惑于左道歸罪其子三事積歲獄不決君立正之上官交薦淳熙己亥宣教郎知辰州沅陵縣始至帑庾赤立常賦或隱或逃催科無所指君推見弊原

訓戒丁寧民信服樂輸糧留縣周舉以送州又藏餘力於民先是城寨有名無兵蠻獠教犯省地人被殺傷例償骨價錢君招補闕額時其衣糧勉以武藝邊境遂安調湖廣等路總賦所幹辦公事分治九江紹熙甲寅通判南安軍奉法循理務舉其職郡縣吏有罪監司委君究一切裁以正強有力者不悅嗾妄人誣訴云君弗恤也請更終主管台州崇道觀內外臺猶入前謾嘗下其事考實君素守家法臨政平允持己廉清迄無毫髮可文致者平生恬于進取官滿輒詣銓部注擬年勞賜服緋魚積階朝奉大夫再奉忠祠終焉少時疾或授導



引法晝夜行之朱顏綠鬢老而不衰故其逝也以微恙  
實慶元五年九月癸巳寔用十二月庚午地在縣郭游  
塘之原娶臨江軍甲族何氏封宜人子克仁將仕郎孫  
男女各一人銘曰

處躬德義承其家

服采郡邑振厥華

溫：佩玉音不瑕

皎：絲繩直無邪

安於六品求弗奢

雖未百年壽亦遐

善始令終衆所嘉

展如之人尚何嗟

邵陽郡丞周府君

因墓誌銘

高宗皇帝紹興二十一年放進士八榜矣里中同升四

人曰孟覺彥瞻辰告及予也彥瞻許氏諱世將老于學

辰告劉氏諱令猷敏于文予碌：綴其間惟孟覺行誼

高一鄉於書無不通於文無不能喜推五行自期頗遠

暨唱第集英殿果衰然在前列人僉謂他日橫翔要路

無疑君亦日夜刻勵將有為于斯世而僅佐遠州又不

及上士大夫咸惜其天爵孔修而歎人爵之不從也况

予同宗同郡同年之情尤嗟惜之其子以工部尚書謝

公諤所狀行實來請銘今既二十年彥瞻辰告前卒君

宅兆亦改卜乃克為之重可嗟矣孟覺諱因姓周氏吉

州安福縣翔鸞鄉應福里人系出吳將軍瑜八世祖廣



居石門之田西曾祖文奇祖仲海父大本以儒起家  
贈奉議郎妣安人羅氏君自幼志趣異群兒八歲出語  
驚人母傾笥篋質經史資其學未冠率四弟肄業後皆  
有立以左迪功郎主臨安府監官縣簿戶部侍詠恃勢  
強傲而吏才實過人兼行府事僚屬無可意日被推辱  
檄君領軍資庫君悉心營職泳喜待遇獨厚二十四年  
勅差省試別院點檢試卷官秩滿用舉者陞用正郎調  
南雄州教授外艱不赴服闋授象州來賓縣令南荒百  
家之聚絃誦聞寂君擇地遷廟學請于州撥公田養士  
躬自教導有梁端者遂與計偕俗病不療惟屠牛祭鬼

君力禁止為市藥桂林教以湯劑境內多盜嚴保伍閱  
鄉丁盜以不作固固常空孝宗覃恩循 文林郎會詔

監司郡守舉屬吏象守唐後又以君政績聞去為德安  
府教授國朝宋元憲景文公兄弟鄭毅父內翰皆邦人  
以文章魁多士自宣和後莽 為盜區庠序廢壞君至  
日加葺治增弟子員講授切磋士氣復振乙酉秋試預  
薦者四皆學職也君送以詩云一網都收泮水英其後  
李松齡遂擢第一甲子之天荒君之力也古郡多人物  
事跡而缺圖志君為鄆城叢紀深得史氏之體改宣教  
郎知婺州永康縣轉奉議郎未至丁母憂免喪知贛州



雋都縣遷承議郎地廣訟繁君躬自省決成得其情郡  
遣公早有所需君不應守恕諷部使者易他官据摭公  
私一無可撻守悟趣還任淳熙二年茶寇有薄境者君  
部弓兵合巡尉却之守益愧服更加延譽通判邵州轉  
朝奉郎七年八月癸卯以疾卒于家享年六十一君端  
實而通明喜論天下事著述規古作耻于蹈襲下筆滾  
滾不休雖尺牘亦粲然成文鄉之先進權吏部尚書劉  
公才邵直敷文閣王公庭珪皆推許之名在甲科未嘗  
自媒每詣曹視可入闕即注以歸淹留遠宦怡然自得  
奉身清儉先疇推與諸弟衣食僅給而周急無靳持論

常鯁挺至接物則謙和樂道人之善而覆其所短平生  
無纖毫過失此公論有不可掩者先廬之南有鑑泉澄  
澈可愛面對鍾嶺環以清溪君卜居其中闢訥齋以燕  
息間嘗語予仕宦倘不遇當老于此極山林之樂而孰  
謂君宦既不達志復不遂也娶鄉里李氏劉氏俱封安  
人五男長稷今為儒林郎新廣南西路經畧安撫司幹  
辦公事次秬登仕郎次穉秬穉早夭秬穉亡矣稷與  
穉俱向學世其家一女適進士劉揖孫男五人壽仁壽  
祖壽夢壽椿一未名孫女三人長適進士曾宏敷次適  
鄉貢進士劉夢驥一尚幼有文集二十卷初葬邑之永



嘉鄉東富嶺慶元三年八月二十五日改葬新喻縣仁里鄉城岡之原銘曰

嗟乎孟覺天之生君謂無意耶何賦之以異才而發之以魏科謂有意耶何名位之不高而壽祉之不遐莽蒼：兮難問徒歎：其長嗟若夫行誼修而表于鄉學術博而昌其家雖千百年猶未泯竟孰為少孰為多耶

葛先生源墓誌銘

古者實實興之士論定于鄉是以上不失人下無遺材後世升黜一以程文賢能不皆進愚不肖未必退往：

出於偶然曰此公舉也而鄉評不在焉若乃德行道藝修之身信于人雖曰未遇而無智愚小大生則推尊之沒則追思之是謂鄉評殆與公舉相為權衡然彼猶可幸得而此不容力致輕重斷可識矣吉為士之鄧林鄉評所推今有人焉葛先生是已先生諱源字德源系出常州祥符間名宦者始登科自是世策高第或至侍從輔相惟先生高祖詠徙家廬陵曾祖日宣祖敏求考經俱有文行叔祖遵岷先生敏修擢元祐三年甲科受知蘇文忠公黃太史坐上書入黨籍學者宗之先生四歲而孤又七年母亡依仲父唐州錄叅緯苦學忘寢食手



抄書鉅萬無一字行草貫通經子歷代史書端醇詳雅  
士大夫子弟爭願從之胡忠簡公及其群從號儒先甲  
族競以書幣延致亦嘗不鄙過予家塾晚即所居講授  
八邑暨傍郡秀民著錄盈門先生迪以行誼非但章通  
句解而已後多登第游宦薦春官者不論也初錄叅老  
而貧同產滋流落湖湘姊娶居先生並迎歸奉養整束  
修畢其婚嫁常產闕如也遵岷既無子錄參為之繼先  
生亦謂參鞠育不可忘身主其祭孝友類此郡博士給  
賢名請為直學遷學錄慶元六年四月甲午以疾不起  
博士率諸生奠哭盡哀鄉人皆來弔曰鄉先生亡矣享

年七十有五以十二月甲申葬郡西清塘之原娶同郡  
曾氏生三男長琳早世次玠季環傳父業玠再預賓貢  
四女長適貢士曾友節仲適吳簡卿叔王及：天改適  
尹先達前先生十二日而止季適田逢原孫四人一男  
祀三女俱幼所著有草茅早論三卷壽齋筆語四十卷  
先生存心恕而勇于義嘗集本朝死王事者著旌忠錄  
三卷名士多為序跋常州族立象天司成次仲之子乾  
道中來守廬陵於先生為從兄先生旅謁即退立象代  
還執手歎其安恬予自上印綬與先生及歐陽伯威歲  
講同甲之會月為真率之集先生文華有餘凡予小圃



草木猿鶴悉為賦詩語新而事的卷軸盈篋今失良朋  
能無永歎玠等乞銘其忍弗從銘曰

修其天爵 席以儒珍 昔聞其語 今覩其人  
士無賢愚 曰鄉先生 盍祭于社 永光榆枌

平園續稿卷第三十二終



